



古學先生文集

上巻

16
1614
1




和16
1614
14

論春秋鄭伯克改
荀子性惡

古學先生文集序

古學先生好古也信學道也篤狀貌云爲無一不由於古焉令嗣東涯氏欲傳遺文於無窮謄寫訂正漸成編集其釋經數卷既已



古學先生文集

古義堂藏

就鏤平生所著篇章若干
亦將以付諸梨屬予序焉
披卷歎其美且告曰學者
將曰行道也天有道日月
星辰懸焉地有道山川動
植陳焉道之大非所容以

耳目口舌盡也然云爲文
章道之所貫也則道豈外
乎文哉故古人力學焉今
人亦學焉然古人能進道
而今人之所曰不能接踵
者何哉今人之學佔俾也

詞藻也。如行路之徒事行
 飾焉。未知進路。迷而弗知
 反者。此所以同學而異效
 也。如先生之學。知其大相
 逕庭焉。然如此編也。此亦
 似事詞藻者。此其所以古

耶。將古學亦有然者耶。若
 有少疑于此者。然先生發
 憤忘食。樂道甘貧。所讀皆
 古。而所行皆古。故所著者
 皆無不涉于古。非若世之
 空事華藻。專為雕琢競鬪

是非謾設城郭者。則此文亦可與天之文。地之理。同趣。此豈今之文乎哉。今之學乎哉。而讀其文。雅而正。詳而切。巧而不鑿。淡而不陋。雖闔國鉅儒。少及其肩。

者傳而至。韓國被其稱賞。吁盛矣哉。立先生之門。仰其言行。而不知學道之奧。故今閱其卷。而如啜大羹。而聞韶武。豈得論其調與味哉。僅論先生之所已。

為古學者而為之序

寶永三年歲次丙戌仲秋

穀旦

參議從三位藤原韶光

序

古學先生伊藤君碣銘

北村可昌 謹撰

先生諱維楨字源佐號仁齋姓伊藤洛陽人自幼不
凡既長好宋儒理性之學後疑宋儒學非聖人正統
大學書非孔氏遺書及明鏡止水冲漠無朕等說皆
出於老佛直以論孟教授最善講說發揮聖意勸誘
學者詳悉審明親切著實如尋常話聽者警動多所
奮厲從遊者繼于門其文也思致確實議論深長不
用綺字不見艱澁每一篇出四方爭傳對州醫生齋
歸流傳朝鮮慶州府尹見而歎曰旨新文佳不意日

本有斯人。其性也寬厚和緩。不見憤怒。剪徹匡幅。於物無抵。無貴賤少長。愛而周之。雖粗鄙暴悍者。一再相見。則未有不薰然而心醉焉。家又屢空。而處之恬然。未嘗覺其不足也。先丁妣孺人憂服。暮尋服。考府君。喪三年。著論孟古義十七卷。中庸發揮大學定本共一卷。語孟字義二卷。童子問三卷。文集三卷。詩集一卷。娶緒方氏。後娶瀨崎氏。五男三女。皆能研家學。嫡長胤最明穎善文。寬永丁卯七月廿日生。寶永乙酉三月十二日卒。年七十九。葬于小倉山先塋之次。私謚曰古學先生。嗚呼悲哉。銘曰

先生高尚。

不近利名。

洙泗正統。

本邦主盟。

無一時用。

有千載榮。

學耶德耶。

日月雙明。

先府君古學先生行狀

先府君古學先生行狀

子長胤 謹撰



先君子諱維楨字源佐。初名維貞。字源吉。幼名源七。姓伊藤氏。其先世住泉州堺津。高祖道慶諱某。妣某氏。曾祖了雪諱某。妣某氏。祖了慶府君。諱長之。妣榎本氏。空心居士直治之女。久保氏。大原人某之女。府君本姓長澤氏。居于攝州尼崎。養于曾祖君之家。遂冒伊藤氏。元龜天正間。攝泉二州之間大亂。閭里弗靖。遂遷京師。住近衛南掘河東街。廢著作家。考了室府君諱長勝。字七右衛門。妣壽玄孺人。里村氏法眼。

玄仲之女也。有男三人。先君子其長子也。寬永四年丁卯秋七月二十日甲申午刻。先生生于掘河宅。幼而澹沈不競。有異常兒。甫十一歲。就師習句讀。初授大學讀治國平天下章。謂今世亦有知如許事者邪。既而稍屬詩。出語不凡。眾共嘆異。逮十九歲。從先考遊琵琶湖。賦詩云。古來云此水。一夜作平湖。俗說尤難信。世傳詎亦迂。百川流不已。萬谷滿相扶。天下滔滔者。應憐異教趨。又登園城寺絕頂。詩云山行六七里。往到杳冥中。船遠閒閒去。天長漠漠空。嶺環邨落北。湖際寺門東。男子莫空歎。請看神禹功。皆為長老

所記時。購李延平答問讀之。熟復不釋。紙為爛敗。自是覃心于伊洛之學。專讀性理大全。朱子語類等書。日夕研磨。詣其精奧。作無極吟云。本未曾生豈又歎。悠悠蓋壤共吾身。有人若問斯心妙。無極一圖是箇真。時著心學原論大極論性善論。皆在二十八九歲間。其所居自揭誠脩二字。以自警。俄而罹羸疾。驚悸弗寧者殆十年。所俯晉傷几。不出門庭。左近里人多不識面。其所與語者。井上養白一人而已。時儒學未盛。其學焉者。專以詞賦記誦為務。而講道學者稀。故親舊知識多勸為醫。易售。催督甚苛。先生耳若不聞。

千辛萬苦始得如志。附宅於仲弟。僦居松下巷讀書。問求之于佛老之教。嘗修白骨觀法。久之而覺山川城郭悉現空想。既而悟其非。是而醇如也。寬文壬寅京師地震。遂還家。先是有疑於宋儒性理之說。乖孔孟之學。參伍出入。沈吟有年。至是恍然自得。略就條貫。乃謂大學之書。非孔氏之遺書。及明鏡止水。冲漠無朕。體用理氣等說。皆佛老之緒餘。而非聖人之旨。始開門戶。接延生徒。來者輻湊。戶屢常滿。信者以為問世偉人。疑者以為陸王餘說。先生處乎其間。是非毀譽恬而不問。專以繼往開來。自任。時年三十六始

艸定論孟古義及中庸發揮。又設同志會。掛夫子像于北壁。鞠躬致拜。退講說經書。相規過失。又做許氏月旦評。品第人物。倡勵生徒。或私擬策問。以試書生。設經史論題。以課文。月率以為常。延寶癸丑五月。京師大火。先生遭災。僑居于京極大恩寺。先是母孺人患膈噎。奉養慎至。引至三年。時細川越中侯幣召。以侍養無入辭。是歲七月十一日。孺人遂終于僑居。臨終合掌作禮。謝先生孝養之篤。視者感涕。先生服墓。喪是歲越藩大安侯。欽其名行。將致使幣海物。左右言源吉方居母喪。甘旨之味。恐不肖嘗。侯曰。獨不有

古學先生文集卷之五
父在乎。乃賜之使供祖考。及冬宅成。越明年九月十日。了室府君亦卒。服喪通前。凡四年云。及丙辰之歲。服闋。十月始開講論語。月定三。八日。自是論孟中庸三書。反覆輪環。終而復始。及易大學近思錄等書。教授不倦者四十餘年。講必直明主意。間述己見。務欲爲學者受用之地。而不研究末義。述聖賢之言。如述自言。從容饜飮。不事粧點。聽者竦動。多所警發。名望日隆。達于遠邇。搢紳家虛左以待。乃至士庶之往來。過京稍有志者。不問有學無學。莫不願一識其面。一聽其講。叩問道要。質正疑難。虛往實歸。莫不歎服。

投刺來謁者。著錄凡三千餘人。其教導生徒。未嘗設科條。嚴督察。而其友教侯國。訓化邑里者。各成其材。皆爲人所知。平日勸學者。以明道術。達治體爲有用之實材。而戒驚於空文。流於記誦。雖一不識字之人。告之諄諄。反覆唯恐傷其意。聽其言各有所得。其文辭理平穩。務欲易曉。而不事繁文綺語。時推宗匠。每一篇出。傳播咀嚼。人以爲楷。又創譯文會。以國字換寫古文。與學者復以漢字。校其添減順逆之別。以諧文法。甚爲初學之弘益。貞享中。豐之中津僧道香到都。將歸請文。先生贈序云。自入視之。固有儒有佛。自

天地視之。本無儒無佛。吾道師道。豈有二乎哉。人或疑其混儒佛於一途。後乃云。雖釋迦不能離今日之天地。而獨立。則自見儒道之不可離焉。因此膾炙日盛。流布四遠。因對州醫人大塔貞安齋。到流于朝鮮國。其府使安慎。徽甚歎賞。以為其旨趣。固與古人異。而文辭甚佳。日本未聞有若許文。攜歸其國。都逮元祿之季。遂達宸聽。

宣索其文。因兵部大輔藤原貞維朝臣。以進士林。榮焉。平生未嘗出京邑之外。唯南京大坂丹之保津。皆為門生所招。時或一至。元祿中。因鳥居播磨侯忠救之。欽待。到江之水口者。再聽其論說。多所歎異。為撰定其六世祖長源侯元忠墓碑。其學專以論語為主。而孟子次之。以為論語言教。而道在其中。孟子言道而教在其中。其著古義論語每卷。皆安最上至極宇宙第一八字。以致崇重之意。門生或言其甚駭聽聞。後乃削去。嘗言論語孟子為本經。詩書易春秋為正經。其餘三禮三傳等為雜經。總名之曰羣經。而欲為作總序。天和癸亥。稻葉石見侯正休巡察到京。為著語孟字義。既而因長澤純平之請。著大學定本。專據

六

古本之敘。稍加刊定。云格物本非闕也。蓋以八者各得其序。為格物訓格為正。以本文所謂誠意者特舉一項為證。其述中庸發揮以喜怒哀樂等四十七字。本古樂經之脫簡。而非中庸之本文。其論鬼神已下。亦非本書。故斷自此章已下。定為下篇。以其辨正甚多。名曰發揮。其於詩也。以為詩之作。皆直敘人情。凡悲歡憂樂。物情世態。皆於是乎寫焉。故讀之則待人而恕。接物而寬。不徒見勸懲黜陟而已也。其讀之者。皆斷章取義。遊戲自在。本賦是事也。而隨讀者之見識如何。而千變萬化。不可拘一。嘗欲著詩傳舉古人

引詩者于各章之下。以見引詩之活法。有志而未果。其於書也。從朱子吳文正之說。專取今文。以為古文始出于晉隋之間。皆後儒掇拾經傳所引。韋昭杜預等闕為逸書者。以成非真古文也。今文則伏生所口授。而最可信用也。其大禹謨所云。人心道心等語。本出于荀子解蔽篇。而非舜禹授受之本語也。而其大要在知夫子黜無為自化之說。而專斷自唐虞以下為始之意。其於易也。以為古者易學自有二家。有儒家之易。有筮家之易。象象文言。專說義理。繫辭說卦。專言卜筮。今日從孔子之教。以易為義理之書。則當

從彖象以見其義。故專據程傳為主。司馬遷揚雄等諸儒始以十翼為孔子之作。歐陽永叔陸象山趙南塘等皆疑之。先生亦從其說。以為彖象之作。蓋先於孔子也。嘗述易凡例。乾坤及文言。大蒙等傳。其於春秋也。以為直書其事。美惡自見。甚斥公羊穀梁穿鑿之說。專據左氏為說。嘗作經傳通解。節左氏文繫之于經。以明其意。其書未成。先儒甚重。獲麟之說。諸說紛紜。先生以為此公穀二家之脫簡。而然本非大義所繫。左氏所記。獲麟之後。尚有二年。經蓋孔子終身續書。以至四月之前。遊夏之徒。欲見其為夫子之所

成。為記。四月己丑。一句也。故哀公一篇亦作解。其於禮記也。以為出于漢儒附會之手。然間多確言。嘗欲彙而錄之。而未果也。其於天道性命之說。皆專就氣為言。而未嘗說理也。大要以為天之有元氣也。猶人之有元陽也。自是已上。聖人無其說。故易唯言乾元坤元。而未嘗說其所以然之理也。又謂仁義禮智天下之達道也。惻隱羞惡辭讓是非。人之本心也。人苟知擴而充之。則得能成仁義禮智之德。此孟子立教之本旨。而曰達曰充。皆學者受用之方也。惻隱羞惡等四者。至於仁義之端本也。非仁義之端緒也。自漢

已來。至於宋周子。猶仍其說。至程朱子出。始以仁義為性。而四端為情。於是體用內外持敬主靜之說興。而擴充存養之方疎。嘗言天下莫尊於道。而教次之。性則成道。受教之地也。勉年述童子問三卷。以明其意。專述修齊治平之要。最備學者受用之功。又嘗言聖人因人以立教。不立教以驅人。又言害於人倫。遠於日用。無益乎天下國家之治焉者。皆謂之邪說。皆謂之暴行。又言儒者之於王道。猶孫吳之於兵。盧扁之於醫也。人以爲確言。凡纂述之書。逐旋修改。未嘗停手。故其書未嘗刊刻。門人傳錄。亦多異同。其於古

人。最服范文正公明道先生及許魯齋三人。嘗序魯齋心法。而刊布之。以爲有實德而後實材。從之云。其爲文。專宗唐宋八大家。而文選浮靡之習。明氏鉤棘之辭。皆不取焉。在明。唯取唐荆川順之。歸震川有光。王遵巖慎中三家而已。其爲詩。專祖杜詩。以爲詩之聖者。嘗愛看鶴林玉露詩人玉屑等書。又嘗稱桓寬鹽鐵論。以爲其論王道。合於孟子。又謂陸宣公奏議。真西山衍義。皆有益於治道。性資寬厚。和緩。人不見其疾言遽色。不設城府。不修邊幅。未嘗爲古怪迂僻矯激之行。以取駭異。人無少長。接之以誠。無厭怠之

世宗皇帝御製
卷之四
色及其大義所關。雖誘之以萬鍾而不可奪也。常好書字而未嘗模臨法帖。每日晨起先憑几亂書楷州數紙。家人促餐頻頻而始罷。率以爲常。間遇適意或賦和歌。真率遣興。不要巧緻。常值天氣明媚之候。拉子弟三數輩。杖屨倘佯吟詠而歸。家本寒薄。伏臘難支。先生居之泰然。儉素自牧。不求贏餘。非不求仕也。而不爲求仕之計。非不避禍也。而不爲避禍之謀。利害得失。一不介懷。嘗題壁云。天空海闊小茅堂。四序悠悠春色長。笑殺淵明無卓識。北窗何必慕羲皇。又遇新正詩云。家本十餘口。旣無尺寸田。幸逢大平日。

自免米鹽蠲道。以唐虞準學。從鄒魯傳。眼前兒女侍。萬事醉陶然。其囂囂自得之境。蓋如此云。嘗號仁齋。所居堂前有海棠一株。因又號棠隱。所著論孟古義十七卷。中庸發揮。大學定本。周易乾坤古義各一卷。語孟字義二卷。童子問三卷。文集三卷。詩集一卷。春秋經傳通解。日札。極論。讀近思錄鈔。皆未成書。娶緒方氏。玄安之女。繼娶瀨崎氏。豈哲之女子。男五人。長胤。長英。長衡。長準。長堅。女三人。仲適小見山氏。餘未嫁。寶永二年乙酉三月十二日丙午未時終于家。享年七十有九。越望日己酉葬于小倉山二尊院先塋。

之側。墳高四尺。以擬馬鬣云。私謚曰古學先生。將以乞文于大手。以表幽堂。是歲八月下。漸孝子 長胤謹 狀

正德丙申。將附刻本集時。校定一過。

[Faint bleed-through text from the reverse side of the page, including characters like '狀', '正德', '丙申', '將附', '刻本', '集時', '校定', '一過']

古學先生文集目錄

卷之一

序類

送荒川景元赴紀州序

送山口勝隆序

文式序

送片岡宗純還柳川序

一安家訓序

送浮屠道香師序

送肥州村上生歸鄉序

古學集 目錄

送木村信甫歸羽州序

雪浪堆詩歌序

送吉田元發序

刻魯齋心法序

贈巖崎元質序

蕉牕餘吟序

和歌四種高妙序

四季倭歌選引

書類

答安東省菴書

答安東省菴書

與片岡宗純書

答蘆田祕書書

答稻毛道迪書

代原永貞與朝鮮國梁宣附官書

代原永貞與朝鮮國尹樂川書

答鼇雲禪師書

記類

敬齋記

小河南省宇所藏小紫石壓書記

古學集 目錄 二

古學堂生文集 目錄 二

遊攝州記

卷之二

論類

太極論

性善論

心學原論

漢文帝除肉刑論

論春秋鄭伯克段

論齊侯使弟年來聘

論堯舜既沒邪說暴行又作

跋附

荀子性惡論

孟子勸諸侯行王道論

論諸葛孔明非王佐之才

解類

父在觀其志章解

智仁勇解

卷之三

辨類

儒醫辨

鵝湖異同辨

古學堂生文集 目錄 三

世學堂生文鼎
目錄
三
世義堂

春秋制作辨

大學非孔氏遺書辨

語孟字義附刻

說類

仁說

立誠持敬說

洪範九疇說

詩說

不知命無以為君子說

名稻雷氏子說

銘類

青山石銘

并序

八尾君玄長墓誌銘

龍見院鳥居侯墓碑銘

未刻

贊類

歷代聖賢道統圖贊

炎帝神農氏贊

題跋類

賀知章孝經跋

題白雲集後

題白氏文集後

世義堂藏

古學先生文集 目錄 四

題源義經圖像

跋張即之書

題德山毛利侯所藏圖菊

竄正周伯弼唐詩三體序

并跋

書宣聖十哲像後

卷之四

講義類

人之所以異於禽獸者幾希章講義

牛山之木全章講義

無或乎王之不智章講義

羿之教人射章講義

仁人心也章講義

拱把之桐梓章講義

無名之指章講義

鈞是人也章講義

仁亦在乎熟章講義

天爵人爵章講義

志學章講義

諸友為余賀七袞宴集講義

卷之五

策問類

私擬策問

策問四道

私擬策問十五道

筆記類

同志會筆記四十八條

卷之六

雜著類

同志會籍申約 并序

同志會式

同志會品題式

書齋私祝

格物訓義

斜几制度

讀諸葛孔明傳

讀宋史道學傳

私試制義會式

讀家禮

辨史記之謬

書良秀事

紀談二條

讀予舊稿

漫筆

古學先生文集目錄畢

古學先生文集卷之一

于長胤 編輯

序類

送荒川景元赴紀州序

凡天下之事。成最難矣。而惟學為甚。學有四難。立志難也。識真難也。久積累難也。遇良師友難也。立志以至聖賢為期。識真以崇正學為本。久積累為其有大成也。遇良師友為其得造命脉也。古之君子所以能成其學者。蓋其立志不回。信道不渝。自其始志于學。

而及乎出仕。中間二十有五年。身坐庠舍。手披簡編。服行乎道德。逍遙乎六藝。然猶且就正有道。咨詢朋友。必得其冑。繁而後止。故至於其成之日。如月之恆。如日之升。若決江河。沛然莫之能禦。存則道被天下。沒則名垂青史。昭昭乎。至于與日月爭光矣。今之君子。不然。其學也。以利。而其勤也。以名。是非之不問。當否之不辨。聞講而進。聽講而退。逐隊隨行。日幾百迴。黜實崇華。誇多鬪靡。汲汲乎。惟人之不知。是恐。纔得升斗之祿。而適平生之欲。則六經傳註。束之高閣。目不過書。口不道訓。抗顏對客。瞋目罵僕。揚揚然。自以

為莫我若也。及乎其末路。灰冷與艸木同朽。腐則雖欲自悔。而不及。悲哉。而世之為人之師者。亦不知所以教之之術。或其有才也。斷而小之。長者摧焉。伸者屈焉。不能引而上之。反糜其足。後世不能成材也。宜哉。荒川氏之子景元。年十六。以博學能文。名震京師。其志將以為古人之學。而不為今人之為者也。頃嘗被徵辟。將有南州之行。親戚故舊。聞之。而有悅者。有褒者。有惜者。有憂者。其悅者。私景元者也。褒者。羨景元者也。惜者。知景元而疎遠者也。憂者。愛景元而欲深成之者也。其悅且褒之者。固人之常情。而惜之者。

徵辟 古語曰 一 郡 李相者曰 一

亦未知其實者也。但其憂之者，豈得非太迂且過慮者耶？夫若景元之才之學，固所謂吾家千里駒者也。然而若吾聖門之學，與天地合其大，與日月合其明，四時不能違其變，鬼神不能逃其情，收萬物而不遺，會百氏而拔萃，浩浩乎其不可量也。固匪生質之敏，十數歲之功所能盡焉。而九仞之井廢於一尺之不及焉，則豈可不為之過慮哉？且古之人有愛其人，則杖其以賢良稱之者，今若景元之學，未必及乎古人，而其褒之者，非直以賢良稱之，則愛景元者之憂至深也。豈不宐哉？況乎紀侯之辟子也，非愛子之學止

於此焉而求之，必也欲侯子勉節學成道隆，明治亂之機，審國家之大體，寘諸左右，備其顧問，子其勛哉。然吾聞之，紀侯國姓尊長，諸侯大藩，仁賢好士，政治清明，其府吏士皆諄諄然有古良士之風矣。子入其國，服習其俗，深漸其化，則心正身修，德器大成，必不至為都下少年多言浮躁，愛為紛華者之態。此足以慰憂景元者之心也。子行矣，事其大夫之賢者，友其士之仁者，而其中有德行道藝者，必以師事之，恭以持己，謙以接物，行勿或取侮，言勿或召禍，勿從衆競進，勿高己矜飾。詩曰：庶幾夙夜，以永終譽。子行矣。大要

在乎自務焉而已爾

寬文九年己酉季夏日

送山口勝隆序

時運之來甚至微。而盛衰之形亦非區區得失所能致也。蓋國家將治必右文而左武。其將亂也必貴武而賤文。故周人尚文。曆過其數。秦人好武。傳纔二世。尚武之與尚文。治亂異驗。豈非千萬世國家之明效哉。昔在吾朝廷天之間。文物之盛。殆與漢唐肩差。非吳蜀元魏之所能及。豈不盛乎。然今士大夫皆曰。日東本尚武之國。何片文爲。豈其然哉。厥後暨乎源平氏起。天下初亂。禮樂典章。日就壞墮。及乎元建之

後。干戈相尋。戰爭不止。專任威武。蔑棄文教。天下之衰極矣。茲及昭代。海宇載清。昔敷右文之教。兼慕唐宋之政。反數百年陷塗炭之民。而一旦措之於衽席之安。可謂大幸矣。而近年已來。理學初開。人尚實行。家誦孔孟。戶宗程朱。度越前古。實萬萬矣。但近世士大夫類皆木強。不知學。其觀讀書者。必曰爲學多損人。又曰學文則必害於武事。而今顧曰非學無以成人。非文無以濟武。於乎風教之能移人心也。若此。可謂膺泰平之昌運。基無疆之鴻業。其國祚之永年。豈可復限量哉。在乾文言曰。見龍在田。天下文明。猗歟。

何幸躬自見之耶。山口君勝隆者，大內義隆公七世裔。器度寬洪，義不苟容。自少小以馳騁射獵爲家，以試鎗飛礮爲業。去年春嘗來自武州，留止京師，都下有一瞽者，知道人也。本與君爲僚屬，又與余相友善。君嘗介紹此人來臨余廬，自後屢相往來，講磨無廢。纔半歲餘，稍曉句讀，又能說義理，議論風生，坐客皆服，可謂奇士矣。夫觀一人之所嚮，則知萬人之所嚮；觀萬人之所嚮，則知天下之所嚮。君武弁之種，生不知學，今年旣踰四袞，始好讀書，則知天下兜鍪之士與君同好者亦幾人哉。嗚呼！君之學纔止修其身，

已。然足以知天下之所好尚也。則君之學豈不亦大乎。助哉。頃又將還武州，求教於余。余曰：君武人也，素善識武，然而君之所識者，徒武之事，而非武之本。請告之以武之本。夫武有本，脩身是也。脩身有本，仁是也。故非仁則無以脩身，非脩身則無以能武。苟能武之事而不識武之本焉，則必殃其身，可不懼哉。夫武所以衛身也。然孫臏不免刑徒，吳起致亾其軀，伍胥鷓夷於吳江，淮陰趙醢於漢庭。夫武者所以威敵也。然古戰國之君多至招仇怨，殞軀喪國，皆不知武之本故也。湯七十里，遂保桀之九有；武王三千，能勝紂。

之億萬。漢文恭儉。匈奴逋竄。尉陀稱臣。豈非得其本之謂哉。鄒軻氏曰。天時不如地利。地利不如人和。是也。君今讀書。雖得知武。未嘗不爲文。文未嘗不爲武。然於武之本。恐未也。故於其行。聊以此爲贈。寬文九年己酉閏十月。

文式序

作文有儒者之文。有文人之文。儒者之文者。孟荀董劉韓李歐曾之類是已。至於文人之文。顧事瑣績。輕剽浮華。不足以登樽俎之間。昔吾朱文公嘗校韓子之書。又深好南豐後山之文。豈不以其體製之正。理

意之到。而動循繩墨。無一字之散緩乎。然則文之爲文。可見而已。然世稱好理學者。或棄去文字。而不理問之。云是不關吾學也。嗚呼。非言無以達其意。非文無以述其言。讀書而不能爲文。奚以異乎。有其口而不能言者也。故孔子曰。言以足志。文以足言。言之無文。行之不遠。惟吾邦學者。大抵無能爲文。蓋天下之學。必得其門。而後入。昔人有讀伯夷傳一年。復大悟作文之法者。豈非學之要。不在於多。而貪焉。而在於少。而熟耶。而世之編文者。連篇累牘。動至數百千篇。雖家有而人誦之。然若崑山之玉。不勝其多。鄧林之

材反厭其繁。記前則遺後。涉此則漏彼。泛然終莫得其有繁者。是無門也。故詮次韓柳以後。近儒者之文者三十四篇。名曰文式。欲使學者先曉其分數。而後廣及乎守禦之具。苟部曲既整。則雖多多益辨。可也。詎止十萬而已哉。

初年甚信程朱。最尊大學。右諸文。可見其繁矣。
長胤謹識

送片岡宗純還柳川序

洛陽歷代帝王都。而山川風氣秀麗明媚。珠翠犀象。灑迤街市。禮樂文物之盛。賢智材藝之富。莫之與京。

故四方遊學之士。靡不魚貫輻輳。相繼而至。東至奧羽。西盡隅薩。南紀北越。山陰海道。凡少有才且敏。欲業文字者。來留止于此。不知其幾千人矣。然而及觀其治任而歸焉。則有空手而歸者矣。有拾瓦礫而歸者矣。有承敝篋而歸者矣。而求其得珠玉以歸者。則寥寥矣。故吾始焉而悅之。勉焉而厭之。而最後又思其或有自屹然於流俗之中。而潛心聖賢之大業者。在于其間矣。柳川片岡宗純生。以去年春來遊京師。嘗舍刺訪予廬。予觀其為人也。言語有序。進退有度。雍容閒雅。大非向四方遊學之士比。予疑之曰。其性

中華

然乎。將由其所學乎。因款其所學。則曰嘗學於同邑安東省菴先生者。而又出其師文十數首。而跡之。執而閱之。則皆出入經術。根據義理。鑿鑿有意味。繇歎曰。生之可觀者。因此而已矣。又自憇曰。吾前所欲得而觀之者。則此人也。而其師省菴。又得中華真儒為之師。則柳川生之藍田合浦。而非假求之洛市焉者也。然而吾又有欲為生一言之者。孔子曰。富而可求也。雖執鞭之士。吾亦為之。如不可求。從吾所好。蓋不求富貴。而從吾所好。固已難矣。吾欲從吾所好。而父兄不我從。則奈吾所好何。此而不變焉。則非實出于

天性者不能也。然而父兄之不從。猶可以言解。至於內而宗族外而執友。又外而鄉黨州閭。羣笑衆譏。拊手反脣。非之以為愚。責之以為狂。而不變者。則百無一二。今之俗皆知貴醫。而不知貴儒。其知為學者。亦皆為醫之計而已。吾嘗十五六歲時好學。始有志于古先聖賢之道。然而親戚朋友以儒之不售。皆曰為醫利矣。然吾耳若不聞。而不應諫之者。不止攻之者不衰。至於親老家貧。年長計違。而引義據禮。益責其不顧。養理屈詞窮。而佯應者亦數矣。時我從祖來自播州。往而見之。拒而不納。蓋怒吾之不改業也。親戚

逸莫可考

從傍解之。而後始得見焉。愛我愈深者。攻我愈力。其苦楚之狀。猶囚徒之就訊也。箠楚在前。吏卒在傍。迫促訊問。不能不應焉。然而以吾好學之篤。守志之堅。而後得到于今矣。大凡俗之所尚者。在利不在義。在勢不在德。愛我深者。則我讎也。生之志學也。未必在吾之下。而攻生之深也。未必在吾之上。而以生之學之才。又未必為下。喬木而入于幽谷。故吾亦不深為生憂之也。生勉之哉。今又以疾告歸。生之言曰。病瘥將復來。吾亦欲生之以歸。而所聞于其師者。教之於我。故於其往。不為之贈。而為之請。

一安家訓序

人之於福。莫大於有賢子孫。而子孫之賢。莫大於讀書曉道。能承父祖之志。然而其為父祖者。亦非必為之延師。招友。附授好書。使其熟乎耳。深乎心。誘掖獎勸。習與性成焉。則為之子孫者。亦不能自賢焉。夫幽蘭芳桂。必生深谷。仙芝嘉艸。必產靈壤。則凡為人之父祖者。不可徒望子孫之賢。而不豫為之地也。古之君子。必有家。今家訓等書。以貽其後。蓋為此也。一日予友一安翁。來訪弊廬。自出一小卷。示予曰。此予為子孫所著家訓也。願請子之一言。以揭示卷端。而使

子孫有所持循焉。予伏讀之。其言直。其理正。鑿鑿乎本於經義。出入于道德。一一皆從肺腑中流出。而大非世之具故事。工模擬。慕名掠美者比。其爲子孫慮。可謂至深切矣。而人皆知遺金帛田園之爲厚澤。而不知遺道義風節之爲厚澤。最大且遠。實萬萬也。然則爲先生之子孫者。其爲幸也。不亦甚大乎。予以爲有是子孫。而無是父祖。則過在父祖。有是父祖。而無是子孫。則罪在子孫。若先生之於子孫。其培養訓導之方。實出至誠焉。則爲先生之子孫者。又豈可不知所自顧焉哉。其有是父祖。有是子孫。若螺贏之克似。

若瓜瓞之引蔓。縣縣續續。流芳繼馨於千載之後也。必矣。謂爲漢章長孺。楊伯起之流。亞可也。猗嗟盛歟。猗嗟盛歟。予之不文。平生澁絕。于請文字。而不敢作。然而先生之於予。年邵交久。義不得辭。且深嘉先生之志之教。實有合於古人。而其餘波。亦足以爲世之爲人之父若祖者之模範。不自揣其謏劣。序而還之。先生名元喜。姓壺井氏。嘗爲肥州郡守。屬官素著良吏之名。云。貞享元年甲子冬十月。送浮屠道香師序。余少時甚好學。忘寢食。廢百事。唯學之耽。不爲名進。

亦可考

不爲利務立則見其參于前居則見其遊于席凡至於飲食談笑出入應接野遊郊行望山瞰水暨聆里巷歌謠觀市上戲場觸機隨事舉皆靡非吾進學之地矣自以爲吾性愚魯百不足稱然於好學一事雖聖人亦不敢讓焉其自信之也如此夫愛類於己者而惡異於己者人之同情也無擇親疎遠邇苟聞好學而勤勤而有成焉則注視傾想欽仰嗟歎若聽空谷之足音若在遐荒而逢故人忻忻然有不勝其悅者也雖浮屠醫方異端小術之士有嗜學勤業蘄然特起於衆者心竊慕焉將以引之奚以異視釋道香

師博學不厭遍讀大藏經譚玄理津津如也又深嚮吾聖人之道自詩書語孟而下至於閩洛諸君子之書靡不涉獵探討講磨切劘以究源委之所自豈向所謂嗜學勤業蘄然特起於衆者夫非斯人乎夫非斯人乎近且覺宋儒之說與孔孟之道有差聞予講古學而遠來自豐州質以所疑予爲剖別其紕繆以告之師一聞之便釋然矣因謂世之儒者徒咀嚙宋儒之說而未博涉緇林之書所以不知宋儒之學本自禪來惟我能識吾子辨宋儒之繆實出於不得已而語之詳擇之精指斥疵病抉剔瑕類昭昭然晰晰

然莫能逃其情。乃孔孟之真傳也。從此相得。權甚近。又將歸于豐。謂子曰。願為我述一言。以示為學之法。子曰。我素寡陋。謏聞奚足以為子之贈。然問而不告。非禮也。告而不盡。非忠也。擇之在子。詎敢盡言。夫自學者見之。固有儒有佛。自天地見之。本無儒無佛。唯其一道而已。所謂道云者。即天地之公道。而非一人之所得。而私焉。雖聖人莫能損益之也。今師生在于天地間焉。則當從今日之天地而求焉。勿向前求之。勿從後推之。捨近而求于遠。非善道也。厭常而趨于異。非善教也。天地之間。必有父子。有君臣。有夫婦。有

昆弟。有朋友之交。晨興而夜寐。夏葛而冬裘。雖天子不能革焉。雖聖人不能易焉。亙古今而準四海。根乎人心。而通乎物理。是吾所謂一道也。雖佛不能離於今日之天地。而獨立焉。則可知離於今日之天地。而無所謂道者也。師之道。吾之道。豈有二焉乎哉。亦唯其是而已。吾聞佛之教。以貪瞋癡三者為其大戒。雖儒者犯此三戒焉。則吾不見其為君子。況於名為佛之徒者乎。今儒者必欲攻佛而廢之。佛者必欲援儒而一之。如虎相攫。如牛相舐。執戟相鬪。固壘相守。未必不相涉此三戒。今師之問我。我之告師。從容和寬。

古學堂先生集卷之十一

十一

古學堂藏

意消氣平問焉而無所荅焉而無所諱何瞋之有
倘使佛聞之必拊掌稱善哉於是乎書 貞享二年

乙丑二月六日

送肥州村上生歸鄉序

物各有其用矣苟不適其用焉則雖巧其製雅其貌
精緻工妙足悅人意然皆為無用之長物有猶無也
今夫造筆為可以書字鑄刀為可以割物舟之用在
於乘之以濟險車之用在於駕之以般物筆焉而不
可書則非筆刀焉而不可割則非刀而不可濟之舟
不可般之車皆所謂無用之長物而不足稱其名矣

實用之學

天下之物皆然夫物之不適其用人猶知其為長物
而至於學之不適其用焉則人視之以為常而不知
異焉斯之謂不知類也又有甚焉者予嘗過市店觀
賣糕者必於架上雕木膠粉模其形以為之標揭就
而視之瑩然糕也取而欲噉之則頑然木矣於乎今
之講學者奚以異乎此夫學者將以行之苟學而不
適用焉則誦數雖多詞章雖富皆無用之長物而至
於儒名賈行內莖外厲銜名喪實鮮衣麗服侈侈然
揚揚然務傲於俗人者又猶架上之糕瑩然其外木
其中而不可得而食焉不免於釣名欺世之罪亦可

哀也哉。吁。此誠學者之罪也。不可以不自責自咎。痛
艾深懲。求於稱學者之名。而爲有用之成材焉。若夫
器既成矣。用既具矣。有所可大施焉。而人不之。用則
亦任事者之罪也。詩曰。坎坎伐檀兮。寘之河之干。在
已何怨之有。吁。學而成其用。固難矣。而所託得其人。
益難矣。是故兩者相得。自古爲罕矣。肥陽村上生。久
從予遊。才氣秀乎外。志向定乎中。嗜學好文。鑽研商
確。勉力不已。其志將以有爲也。而又得賢主人。而事
之。可謂得自古所罕者矣。豈非幸歟。豈非幸歟。頃將
歸于肥陽。欲乞余之言。以往。予也非能言者。然而不

言今時之弊。則古人之學不顯。不論學者之陋。則聖
賢之道不明。是瑣瑣小言。固不足以爲生之贈。然欲
生歸以此告語。其鄉之小子。而樹風聲於西面一方
矣。故不嫌其言之不文云。貞享三年丙寅六月七日

送木村信甫歸羽州序

古稱用志不分。乃凝於神。信乎斯言也。蓋一則專。專
則精。二則分。分則散。故學必要於一。欲其精也。人有
五官耳目之相須。猶手足之相待。瞽者善聽。聾者善
視。合乎一也。觀夫世之聾者。人以指書空。一見便了。

亦不蹉一字。猶右臂痺者必以左手能畫字也。然此徒以其見於外者而言。若論其專於內者。則凡物之撓心者。皆從耳目入焉。或聾乎目。或聾乎耳焉。則內斯專矣。聾者之善聽。聾者之善視。本由其專於內故也。嗚呼。人之於學。莫難於聞道。人而不聞道。則雖生猶死。故曰朝聞道夕死可矣。苟得聞至道。一聾奚足恤。木村信甫。遊學京師有年矣。忽罹充耳。喪然之疾。不得與人交談。從此杜門掃軌。一意以讀書曉道為務。翳除藩開。積疑頓祛。向也艱而難通者。渙然冰釋。茫乎難憑者。至約甚邇。欣欣然怡怡然。甚有頓進之

機矣。昔人有欲求安心而斷其臂者。若吾信甫。不虧一指。不傷一膚。而至於如此。何其幸也。哉。頃將請迂人於其母兄。以歸梓里。予慰之曰。與其聰而不了。孰若聾而了。了開明。吾知子倘不聾。其學未必至此行矣。子安且樂焉。勿以一聾之故。為中心累矣。因貞享四年丁卯七月廿二日。

雪浪堆詩歌序

人之好尚。何所定乎。哉。世趨治平。則文事興矣。時屬干戈。則武備精矣。理勢然也。予觀方今好事家。自南宮墨竹。宜和畫鷹。張楊剔紅。官哥磁窰。以至於薛濤

世學先生文集 卷之一 十五 古義堂藏
之箋。方程之墨。瑣瑣文房之具。宴閒之器。必以漢物。爲尚。足以下世之趨。治平矣。杉平吉得一研山。明戴笠所持來。號雪浪堆者。蓋取蜀江雪浪。西江滿也。石底有笠所朱書雪浪堆三字。又副以詩艸一幅。笠本明國秀才。嘗肄舉子業。不售。來于長崎。薙髮爲僧。號獨立。彼去漢而來於日東。無一物之隨。惟攜斯石來。則必是奇石也。其峯岬巉巖。奇秀。潘實足稱石友之亞也。按漢地產怪石者甚多。靈壁爲上。應石次之。將樂又次之。其他英州及融州老君洞四川桂川寶慶府平江太湖皆產佳石。予非精鑒。然據地志。靈壁

不起峰。色如漆。間有白細文。且靈壁將樂二研山有圖傳于世。英州四川桂川等石。其所論次。大概亦可見。但應石老君洞未審其形狀。又崑山滇海永安溪中皆生奇石。想斯石必是斯地所產也。平吉旣得之。又遍請諸名士爲之歌詩。裝爲一卷。嗚呼。人之好尚。繫乎風俗之醇漓焉。則平吉之愛斯石。豈不足以副冀治者之夙望乎。予素不善歌詩。故請以爲之序。又寓頌願泰平之意云。貞享四年丁卯八月上戊日。
○送吉田元發序
古人以家貧親老。不祿仕爲不孝。然觀夫世之業儒。

者類多貧窶不能養親早歲出仕者比比皆然至於其篤信淡志負有待之才而以親之故不能肆力於學者最可憫也已蓋欲優於學則不足於孝欲優於孝則有妨於學君子必先孝而後學蓋以外孝別無所謂學者也吉田元發將赴武城亦家貧親老干祿仕者也然非唯元發自憂不能卒業人亦恐其志之不底成予謂不然也由俗學而言之固若其所恤者若由實學而言之此即是學也夫學者將以行之何妨之有昔明道程先生弱冠後從仕學問從此而進又聞金谿陸氏合族而食每輪差子弟掌庫三年象

山先生為後生時適當其職因所學大進蓋道外無物物外無道故君子以事與學為一但不知學者專以親書冊為學而不知事即學也故有欲優於孝則妨於學之嫌鄙哉二先生之事其明鑑哉且元發之言曰吾學未成以是干仕進將以欺人也而赧然予深感其言之有合於君子之心而益信其學之有成矣蓋力生於氣氣生於勇勇生於知恥知恥之道其大矣哉其言有可取者故併按焉勉哉

刻魯齋心法序

予於古今人物得三大賢宋明道程先生也范文正

公也。元魯齋許先生也。觀夫賢者之表表於世焉者。博學文章。才節行義。固不乏其人。惟實德為難。蓋有實學而後有實德。有實德則實材隨焉。於乎學而得實德。古今幾人矣。若顏曾思孟之大賢。固勿論。漢唐以還。鉅儒碩學。歷歷史冊。項背相望。然於實德則病焉。何哉。蓋無實學也。學有真有假。而假有數種。文章也。博洽也。雜異端也。似真而出於好名者有矣。真而未至。流而為假者有矣。其不能成實德也。宜矣。夫學者將以行之。不行不足以為學也。昔伊尹耕于有莘之野。而樂堯舜之道。任以天下之重。顏子在陋巷。輒

問為邦。豈有文章博洽。雜異端。似真而出於好名之慕乎哉。宜乎。其有實德而成實材也。而觀春秋戰國之際。賢士大夫。諸子百家之流。其為學也。將以致用。非徒為觀美。故真純踏駁。大小淺深。舉皆隨其學問之所到。略可紀述焉。降而至後世。文愈熾。實愈晦。學與德判。真與假淆。其間雖有可觀者。亦不免於真而未至。流為假焉。惜哉。若三先生。則不然。明道先生曰。一命之士。苟存志於愛物於人。必有所濟。文正公為秀才時。詣神祠。必祈之曰。不為良相。則為良醫。又曰。當先天下之憂而憂。後天下之樂而樂。魯齋先生亦

世學先生文集 卷之一
常自謂學孔子。不陳伏宋之謀。大非俗儒者流。區區文字者。比其議論文字。雖不免時襲舊套。然見其所志所處若此。是何等學術。何等心膽。豈非有實學。有實德。而有實材者邪。予嘗獲朝鮮版本魯齋心法一冊。藏焉。檢焦太史編明經籍志。既不收載。又見世所行公全集。纔依性理大全書編入錄中。語欠載心法一書。則知斯書不遍行于中國也久矣。予嘗懼斯書稍就澌滅。卒弗傳于後。乃使門人謄寫一本。且加訓點。以壽諸梓。癸丑京師之火。朝鮮本既燬滅焉。刻本亦不行于世。其故今不知所在。故重付諸剞劂氏。以

廣其傳。冀公之實德實材。永赫著于後世。而學者亦有所矜式。程范二公。諸儒先輩。表章之詳矣。至於魯齋之德之大。則世罕識者矣。其深知之者。唯薛文清公爲然。故節取圭齋歐陽公撰公神道碑。暨文清數語。以附載于卷末云。元祿四年辛未元日

贈巖崎元質序

予好學乎。吾語子學。讀書時亦學。不讀書時亦學。而後學進矣。夫讀書之爲學。人皆知之。而至於不讀書之爲學。則人未之知也。苟篤信深志。念念在學。不爲他事所勝焉。則起居動息。應事接物。遊戲閒談。目擊

跬步舉靡非進學之地。故曰不讀書時亦學也。夫學者所以明乎人倫。而以反求於己爲要。所謂欄柄入手是也。見賢而思齊焉。見不賢而內自省。攻己之惡。而勿攻人之惡。昔有一將校蓄奴婢十數輩。其所使令皆不稱意。後將校被罷家居。奴婢漸次辭去。窘甚。動心忍性。喜怒自平。於是其所使令皆稱其意。一無不可者。將校因自悟。其不可皆在己。而不在奴婢。若將校者可謂善反求者也。天下本無可賤之人。亦無可惡之人。寬緩處之可也。揆其自新可也。詎痛惡焉。反求之道。其大矣哉。甘受和。白受采。忠信之人可

以學禮子之質甚美。可以爲學。苟卽事當物存心。反求則己之心自和平。而待人亦寬洪。天下何樂如之。勉哉。勿忘。元祿四年辛未二月。

蕉牕餘吟序

蕉牕餘吟者。吾友那波祐英氏之所輯錄也。其平生遊覽會遇。簡寄應酬之詩歌。皆在暨客座所聞社中傳播。凡所關於雅道者。雖片言半語。皆莫不哀集編摩。謹備錄焉。其志將以貽之後嗣。而揭示其好學之篤於雲仍。所慮可謂深矣。而其所會輯。不論巧拙。不事粉澤。隨得隨記。靡所遺置。猶玉質鋪肆。砥礪美玉。

金銀鉛錫。凡世所珍者。無貴無賤。芬紛錯雜。無所不在。其體固叢脞繁冗。雖不當於大方之觀。然而亦有就此而可取焉者。玉藏於璞。金混於礦。儻若以其璞與礦。而棄擲之。則必併其真者而失之。明眼者不然。不以其外之醜。而遺其內之美。必也破璞毀礦。注心彈力。索求之。故往往值其真。伯樂恆求騏驥於凡馬之羣。明王必求賢者於稠人之中。蓋爲此也。此予所以深嘉尚斯集也。夫詩本於性情。故貴真而不貴乎偽。苟不出於真。則雖極奇殫巧。要不足觀焉。至後世則專求巧麗於字句之間。而椎鑿性靈。靡爛情真。出

於其所不思。居於其所不能。而求其得真者。百不得一。近世善評詩者。莫嚴儀卿劉會孟若也。善選詩者。莫高廷禮李于鱗若也。然皆規規乎巧拙之間。而於詩之本。則未之論及。晉三謝以還。至於近世諸大家。比比皆然。要之古人。大有逕庭。予故一筆勾斷。曰剩語焉耳矣。飾詞焉耳矣。謂其識真者罕矣。人皆知巧之爲巧。而不知巧之至巧。不在巧。而在拙。蓋至文不文。至巧不巧。以巧見巧。未爲巧。以拙見巧。乃是真巧。處三百篇之後。淵明少陵之流。是已。嘗聞紀貫之。古之聖於和歌者也。每構思。鍛意。必經二十日。成。今讀

其所作平淡無味如喫清水。又觀其序古今集評騭當時之作曰：人心成華焉，則紀氏之意亦可概見矣。少年慕風華，老大厭焉。學者真能識得此意，而後可以評焉，可以選焉，亦可以自賦焉。斯集也，質而備直，而核廣取並蓄，芻搜併收，隻詞不洩焉。則其間必有得真者矣。所患者在識者之難得耳。若蕉牕子志行之美，記錄之勤，則具于諸賢序，不俟贅余言。故今言其有暗合于古人之意者，以贈之蕉牕，其別號也。

元祿十一年戊寅夏六月

和歌四種高妙序

詩與和歌，一源而殊派，同情而異用，故以和歌之說施之於詩，靡所不可以。詩之評推之，和歌亦然。兩者同條共貫，一一脗合，莫不互相濟用也。詩有四種高妙：一曰理高妙，二曰意高妙，三曰想高妙，四曰自然高妙。礙而實通，曰理高妙；出事先外，曰意高妙；寫出幾微，如清潭見底，曰想高妙；非奇非怪，剝落文采，知其妙而不知其所以妙，曰自然高妙。詩歌之妙無不備，而不出斯四種。四種之妙無盡，而同歸於自然高妙。自然之妙，猶天機之動，天葩之麗，不用人力，不煩雕琢，自然不可及。三代作者，總以此為其本領。一咳一

唾皆成自然之妙相至矣。爾後唯釋阿西行壬生二品三家得之。其他雖稱作者或合或離乍出乍入均之不能全得其妙也。難哉。後世唯知有造語之新奇作意之纖巧而不知有自然之妙。詩歌皆然。意思局促體製猥瑣可謂藝道掃地矣。斯集也。於四種之妙各任意收取多寡皆從其所有。獨至於自然高妙多至若干。皆學者以是當知古人用心之所在。

四季倭歌選引

唐詩尚意興。宋詩主義理。此唐詩之所以庶幾於三百篇。而非宋人之所能髣髴也。其於倭歌亦然。若柿

本大夫紀貫之壬生二品鎌倉右府是已。豈後世以纖巧爲妙。剽竊爲工。用意凡近。務事穿鑿者所能夢寐也哉。今此選也。總取格高調古。意直指遠者。而專以意興爲主焉。若夫淫言媒語。浮靡雕績。傅朱施粉。徒足以供人之翫賞者。皆棄而不收。雖不免於世之譏笑。然識者必有取焉。 延寶六年戊午

夫... 禮... 樂... 節... 文... 最... 為... 難... 明... 況... 先... 王... 之... 道... 禮... 樂... 之... 用... 為... 急... 而... 禮... 之... 節... 文... 最... 為... 難... 明... 況... 非... 德... 之... 與... 位... 兼... 備... 者... 決... 難... 措... 議... 於... 其... 間... 故... 孔... 子... 曰... 雖... 有... 其... 位... 苟... 無... 其... 德... 不... 敢... 作... 禮... 樂... 焉... 雖... 有... 其... 德... 苟... 無... 其... 位... 亦... 不... 敢... 作... 禮... 樂... 焉... 此... 乃... 所... 謂... 禮... 也... 後... 之... 儒... 者... 不... 然... 知... 處... 匹... 夫... 而... 自... 當... 有... 位... 者... 之... 權... 吾... 不... 知... 其... 何... 說... 其... 意...

書類

答安東省菴書

連領累幅教言既荷不遺又欲付僕以聖賢之事業何敢當之何敢當之僕拜書後欲即裁答忽罹微恙荏苒旬月嗣以應接無暇不覺遲留殊睽初志矣夫先王之道禮樂之用為急而禮之節文最為難明況非德之與位兼備者決難措議於其間故孔子曰雖有其位苟無其德不敢作禮樂焉雖有其德苟無其位亦不敢作禮樂焉此乃所謂禮也後之儒者不然知處匹夫而自當有位者之權吾不知其何說其意

必謂吾固有德。可以制禮矣。又必謂不若此。則禮乃壞矣。而不知禮之大本。既已缺然矣。此非老蘇所謂亂與僭與散者耶。然僕竊自以謂準古酌今。自爲一家之禮焉。則可。若欲爲天下定其禮。則不可。此真僞公私之辨。最不可不察焉。若孔子之喪。公西赤爲志。子張之喪。公明儀爲志。則自爲一家之禮而行之者也。若諸家禮範。則欲爲天下定其禮。而制之者也。其事雖似。而其心實霄壤矣。來書曰。不斟酌。則拘泥不通。妄損益。則僭踰有罪。夫禮固不易。損益而弊必易。至拘泥。然拘泥不通。其罪小矣。越禮躐節。其罪大矣。

不若先以古禮爲之本。而至於其不可通者。則或減或闕。別用時俗之所宜。耳目之所安者。臨時參酌之。稍可也。苟有好禮之士。而欲有爲焉。則自有文公家禮儀禮通解在。就此斟酌可也。奚以自制爲。惟禮經廣博。殆若入海取寶。初學之士。遽難得通。僕嘗欲做魏鄭公類次禮。採摭上自尚書三禮。下至春秋內外傳。暨荀子等書。凡一切係於禮者。薈萃彙輯。立門分部。附以漢唐註疏。諸儒論議。脈絡相通。意義明白。使其前足以有所考。後足以有所傳。而其損益斟酌。自付之於後學者之自擇焉。庶乎當自無僭踰有罪之

失而亦免拘泥不通之病矣。然徒有其志而力未能也。天若假我於年，方自成一家人之書，略為行禮者之津梁，不知能成否乎？中間論仕進一段，最深嘆服。其曰：季氏以得臣，孔子門人而自榮焉。然未聞召顏子，抑彼知其不可致乎？此意甚高。然而季桓子遺言召孔子，康子乃召冉求，則彼何憚於召顏子？蓋顏子具體聖人，無跡之可言，故不記及焉耳。然學者正要以此意自養焉。又曰：仕與醫雖不同，而為生理謀，則一也。僕以為不然。士之求仕，亦其常焉。已爾一陷醫家者流，無復可言焉。古之士猶有為貧而仕者，況於今

哀

世乎？孔子曰：非斯人之徒與？而誰與？又曰：君臣之義，如之何其廢之？蓋聖道之大，通於古今，周於人倫，直上直下，與天地同其流。信匪區區曲謹細廉士之所得而知也。自晉人以放縱物外為達，奔走仕途為污，專以清談相尚，而後之詞人墨客，慕倣崇尚，斯風到今不解。且世澆實喪，聖遠道湮，濟世之念，不勝其求進之心。道德之實，或輸夫功利之末，遂不能交孚於斯民。是以世之人，皆以隱為高，以顯為諂，以處為美，以出為賤。雖褒衣博帶，自談道德者，纔知守其一曲為是，而不自知忘世之罪為大矣。悲哉！三年學不至

於穀古猶不易得也。則以學而仕者，豈可與世之鬻
枝求報，潔身廢倫者，槩而同之乎？鄙意如此，不知尊
意又以為如何。僕近為諸生略讀周易，嘗以謂程傳
從孔子而宗義理者也。本義從文王周公而主卜筮
者也。二家皆各有其理，而不可相無。然而六經皆經
夫子之手，而為萬世斯道之權衡焉。則本義之理，慤
實簡當，固可自得。文王周公之舊，然於開物成務之
道，則不若程傳之該盛浹洽，為直得夫子之心也。夫
詩當時賢士大夫，婦人隸夫之詞耳。然及夫子刪述
之，則自為至理之書矣。春秋魯國之一史耳。然及夫

子筆削之，則又為經世要典矣。若易固卜筮之書也。
至夫子作彖繫象文言等傳，而返之義理焉，則實盡
性之書也。況大傳明言易有聖人之道四，而卜筮居
其一焉，則豈可專做卜筮之書看哉？故僕於道理，則
以程傳為主。於文義，則以本義為主。兩者並行，而庶
幾得於先儒歸一之旨矣。聞台臺亦嘗講易，不知當
時講究如何。謹茲併附，以求正於左右。宗純學進，否
其人甚明敏，可喜。未教曰：必不為下喬木，而入于幽
谷。甚慤甚慤。濱田整夫，氣質沈實，議論可聽。近欲為
武城之行，僕強而止之。整夫亦依依不欲捨去。將相

共講論爾承貴門甚富英材有當付託斯道者否僕
嘗著意訪詢後生其有志于道者甚少況至可與議
深造者益少矣頃一書生來僕語之曰讀書如淘砂
取金必也擇其善者而從之可也蓋自非聖人外必
有一長則有一短若專主一家之說則必先得其短
而遺其長此不可不知也其人不心官退而謂僕為
從新建之學者甚可笑語所謂不可與言而與之言
失言實僕之過也大抵非有大氣魄有大力量不為
言句所轉者決難與論君子之大道也不知何日合
併一處共論平生之所蘊儻若議論文字有可受用

者勿恡示及薰沐以待

右書係中年之作故讀易程傳朱義無所軒
輊然為程傳直得夫子之心後來定見已漸
矣至於文王周公作易夫子系十翼則先秦
今世已來諸儒之臆料要不足憑此書中亦從其
說欲識定論須參語孟字義云
長胤謹識

答安東省菴書

僕本艸野之鄙人材質謏劣為世所棄杜門掃軌漠
然度日近歲以來偶有一二同志相共討論特出望
外矣詎意以燕雀之志適與鴻鶴同上冒高明之聽

不虞之譽。在僕最當淡恥之甚也。茲荷遠賜函教。存錄不肖。無我之仁。樂取之美。備顯言詞之表。至感至感。足以觀度。越一世萬萬。志同道合。古之所罕。揚善成美。亦今世之所乏。僕與臺下平生未有一日之雅。何千里神交。若合符節耶。承喻從今教翰往來。商確今古。心期寄之筆札。此僕固所深冀也。然若僕者。學無真師。家無書籍。臆度之見。詎敢言學。徒有進取之意。猶無為己之實。倘不鄙我。當屢奉簡記。就正於有道焉。茲及聞盛命。稍自覺從前芥蒂已釋。然於胸中矣。何幸如之。承聞明國大儒。越中朱先生。躬懷不帝。

舜水

秦之義來止于長崎。臺下忽執弟子禮。師事之。且不蓄妻子。不恤衣食。奉廩祿之半。以作留師之計。其志道之高。行義之潔。非不待文王而興者。豈能然乎。昔者魯齋許公。以竇默之薦。仕于元。河洛之道。獲賴以不墜焉。此雖許公之德使然。亦竇公之功也。儻若先生之道。得大行于茲土。則雖後來之化。萬萬于今。實臺下之力也。豈不偉哉。豈不偉哉。僕嘗聞仙槎著于長崎。竊欲樞柁。相從于門下。然以人子之孝。不可航海遠遊。遂不果往。嗣欲附宗純弟處上狀。又淡恥文采鄙拙。濡滯到于今矣。千萬悵惘。聞先生近以親藩。

之招將赴于武城。僕又欲俟侍養有人往從先生於武城。不知先生許之否。若獲為僕言之於先生。實大幸也。至懇至懇。大抵此事非有真實朋友為之經營。決難成就。然若臺下素以篤志力行直受鄒魯的傳。惟僕欲自承日月之末光。以補既往之蹉跎。無謂我昏妄而舍我。幸甚。僕姓伊藤。名維貞。讀書之室名曰誠脩。自料兩地千里。風不相及。恐姓名錯亂。迷於尊聽。故謹此附聞。瞻晤無期。不知何日。獲一聆警咳。會宗純弟以疾歸往。肅裁以復。不勝縷縷。幸高明昭鑒。

與片岡宗純書

去夏所惠書及七月二十五日書皆已達也。承貴恙已平復。何喜如之。大抵病勢漸進者其病深。卒疾者其證淺。貴體雖似虛怯。證其根實淺。勿深為念。醫書曰。瘦人多火。又曰。思慮甚則動火。賢契素體瘦。膚薄。短氣少力。切欲寡思。省慮。務調起居。僕從秋仲以來。舊病相尋。綿延不已。頃寢復常。以故久闕奉狀。恕登。恕登。近讀何書。成何事。大凡初從學者。其進易。已知學者。其進難。至於通經能文。體段已具者。其進尤難。僕嘗識善基者。言對國手受一二子者。其才已定。雖用一生之力。亦難進。使吾閒居屏處。一二月。方進一

予僕聞之喜甚得吾所欲言者要賢契於此一討其去路大凡因循苟且學者之大患勇往奮發進德之要路不濯去舊見奚以來新知不能有大疑奚以會大進是故進一步難到千里易請於此處夏下一轉語若鄧艾降蜀王濬平吳其計皆數十年間名將智謀士之所不能成而二子一旦決矣豈非向所謂到千里易者邪孟子嘗引成覿顏淵公明儀三段說話與滕文公說吾以是知文公之才實不世出之資而僕於賢契亦然而學者之患多在於以先人之言爲是。不知所以自思焉。譬則戴襪襪子者。惟視前面。左

右上頭皆不見。若卸去之。則赫赫天日。卽在吾目中矣。自王侯大人。以至布衣韋帶。一人必有一箇襪子。子平生所讀書策。平生所守義理。平生所務事業。平生所得工夫。皆爲吾子頭上襪子。一卸去之。然後聖賢真實之指。自相撞著。此言唯可與賢契道。不可與他人道。苟非其人。而謾語之。則不爲一番理障。必笑之以爲異矣。若將易書春秋語孟庸學讀去。讀來。不因註解。不論照應。從容體驗。浚自熟於心焉。則其言皆若從吾口出。其理皆若從吾心生。而諸儒論說。皆在其後。然後方自知此言之不我欺也。勉哉。五

經會讀今已及周易衆推僕進講既至坤之文言林宗孝濱田敬菴屢相會討論每恨賢契不在前所言文帝除肉刑論已著成併錄一本往承賢契亦嘗具豪有復示下古人云士別三日刮目相待聞賢契以明春又來于京師若各爲吳下阿蒙亦可深愧焉

答蘆田祕書書

向蒙示及忌日之議曩時以未查得宋人忌日之例遲留至于今多罪多罪按杜氏通典古者以甲子爲忌日竊謂春秋所書某甲子某卒是已若吾夫子以四月己丑卒則是以己丑爲聖人之忌辰也禮所謂

朔日忌日則歸哭于宗室蓋爲此也若以死之日數爲忌日則一歲惟有一日豈得屢歸哭于宗室乎信如公之所疑也蓋以死之日數爲忌日則自晉宋始通典所謂以周年日數是也愚近考得大明及朝鮮國忌辰用周年日數甚明矣因想宋朝忌辰亦當若此偶未查得焉爾適蒙質正所疑因併及此尊意以爲奈何
延寶五年辛酉季秋仲旬

答稻毛道迪書

昨暮蒙辱光顧得慙渴想甚以爲喜隔宿兼審德履清福僕常好談殊方山川之形勝艸木地產之異宜

然以人不能詳知之為恨。及聆足下懸河之談。疊疊數千言。恰如處其地。目擊其山川土地。何幸如之。何幸如之。蒙賜土物一壺。珍感珍感。難以為謝。近日挈玄宣生。蒙顧弊廬。幸甚。延寶六年戊午夏。

代原永貞與朝鮮國梁宣附官書

貴國與日本。兩地萬里。地脉相絕。非唯風馬牛不相及。僕姓名。固不出里閭。雖公之姓號。亦未相聞。昨公過洛陽。不意邂逅於本國寺僧舍。茶果手談。終日縱談。盡歡而歸矣。非天錫奇緣。殆不至此。別後悵然。不覺相失。以無由繼見。依依切切。徒增鬱鬱耳。因便謹

附數字。聊申忱悃。俯垂炤鑒。聞同寮善書人多矣。欲因公得其數字。故今謹寄唐紙若干幅。蒙惠其數字。幸甚。天和二年壬戌十月二日。

代原永貞與朝鮮國尹樂川書

昨提一友。過本國寺。因梁宣附官公介紹。幸獲識蒞於僧房客舍。且辱書賜大字數幅。珍感珍感。泮水相逢。盡是殊域之人。詎意以一旦會合。交歡盡樂。如此。予由詩云。扇是日本扇。風非日本風。愚以為非矣。扇既日本扇。則風亦日本之風矣。聊以日本風五握為獻。敢申鄙忱。鑒納為幸。同上。

答龍雲禪師書

古人有方外之交。或以道德。或以文辭。或以氣槩。合
 或以清節。通。僕性不修邊幅。惟善之取。見人之有一
 善。則不啻若暍人之值寒泉也。僕雅欽和尚之清德。
 久矣。頃幸挹道範。又辱賜寶箋及傑作一章。多謝多
 謝。不意多年瞻仰。一旦獲之。敢裁寸楮。僅此布忱。但
 瑣瑣鄙言。不能發誠意。一二炤察。且錄拙句於紙尾。
 以奉塵高韻。蒙施郢斧。是幸。

餘竹古曰上度日也

記類

敬齋記

余從髫鬢。既有志于斯道也。然困于俗學。溺于詩文。
 不得進者。亦幾歲哉。幸嘗讀延平先生書。文公小學
 書。始大感悟。於是平生之志。沛然莫之能禦焉。遂定
 矣。而信之益篤。積之益久。一旦融然。利祿之念。功名
 之志。盡得忘于懷矣。且自以為。遊世不知而不悔者。
 固學者之常分也。聖人豈遠乎哉。於是益不自量。以
 斯道為己任焉。而頃又獲敬齋箴讀之。深有愜于懷。
 因自謄寫。以揭諸齋右。起居服習。冀益淑身心。一若

古學知生知集 卷之一 三十一
朱夫子之言焉。繇併名其齋。號爲敬齋。蓋昔人慕其人。則命其名。余雖不敏。慕文公。豈爲僭邪。夫惟敬者。仁之則也。仁者善之本也。捨敬則無以見仁。捨仁則無以見性。故苟不從事於持敬。則雖欲求仁。不可得也。吾道之要。其不在於茲乎。然世之儒者。多徇其末。而舍其本。守其死法。而遺其活法。固非善讀文公之箴者也。蓋六經之學。雖浩博奧妙。若無涯涘。然謂不出於敬之一字。可也。易曰。無思也。無爲也。此敬之本也。又曰。夫乾確然。示人易矣。夫坤隤然。示人簡矣。此敬之德也。大甲曰。顧諟天之明命。此敬之立于內者。

也。堯典曰。光被四表格于上下。此敬之形于外者也。是故一敬立。而萬德順。君子循之。吉。小人悖之。凶。一念敬之。鸞翔鳳翥。一念肆之。山崩海沸。其可不敬乎。昔敬自爲敬。仁自爲仁。今知敬卽仁也。昔敬自爲敬。天道自爲天道。今知敬卽天道也。詩曰。昊天曰明。及爾出王。昊天曰旦。及爾游衍。君子其可不敬乎哉。於是乎記。承應二年癸巳三月下寅日。

此係先君子二十七歲作。始起艸粘諸齋壁。改定數番。及其脫彙。殆無復舊字。予幼時常語其用工之甚艱。時甚崇考亭之學。至倣其

齋名不唯命詞之甚苦。其探索理奧之勤。亦可想見也。後來蕩掃舊見。一倡明古學。亦自箇中來。非苟然也。長胤謹識

小河省宇所藏小紫石壓書記

小紫石壓書一枚。本豫州郡守某親獲之於海濱。與其家臣贈遺惠貺。三四流轉。而後入于小河君之手。予視其石。紫黑色。大纔寸餘。前尖後豐。面底皆平。上起小臺。如印鈕然。橫而視之。有波勢層層之紋。蓋久曝於沙中。為海潮之所蕩搖。然爾其狀皆不煩鑿刻。自然天成。亦奇石也。嗚呼。前珍藏者。皆徒供掌中之

翫。未知所以用之。及于小河君一獲之。僂以為鎮子。蓋因其所好。而得盡物之材也。於乎。若吾小河君。頽然一翁也。然雅尊經籍。嗜倭詞。尤好聚奇書。遇於凡故家之弊筐。好事之蠹餘。祕記奧牒。殘簡舊牘。所未嘗見之書。莫不干求乞假。謄寫輯錄。以藏之於家。每如有物而助之者。可謂奇士也。嗚呼。石之為形質。既奇矣。而屢離他人之手。而卒歸於小河君之藏。益奇矣。夫甚好則必得。甚嗜則必遇。天下之物皆然。吾觀夫世之號為好學者。雖研精焦思。嘔血皓髮。如匡衡之鑿壁。如橫浦之立石。然而皆為名而已耳。為利而

世學錄卷之十一
已耳。謂之真好學，則未也。故究其所得，或止於詩章，或止於記誦，未見其大得古人之祕於千載之後。瑣瑣焉，屑屑焉，鄙矣哉。若夫好學之甚焉，則必有奇遇。每出於其意所需之外。若孔子之學琴於師襄，問官於郊子，在齊而聞韶，適周而問禮，及程子之遇洵篋，叟而悟易，袁先生之見賣醬翁，而受學，蓋精誠之至，自有若此之應，不可謂偶然也。莊生所謂且暮遇之者，豈不信然乎。苟好學，若小河君之好奇，真且專焉。則其自得之也，亦必若有物而助之者也。而馴致居之安，資之深，取之左右，逢其原之盛也，必矣。其斯之

可謂真好學也已。予竊有感于小河君之好奇，故書以為贈。
貞享元年甲子十月二十三日

遊攝州記

庚午四月六日，赴攝州。翌午詣高津神祠，及四天王寺，觀其規制。四天王寺，堂宇門廊，最為巨麗。龍楹螭桷，金碧焜耀，極天下之壯觀。寺下居民，輻湊殆千餘家矣。而高津神祠，甚隘陋，纔四五宇而已。蓋仁德天皇，吾國之聖王，而廢戶皇子，縱蘇我馬子之逆，崇茂棄人倫之教，其可議者固多矣。然高津神祠，其衰如此，而四天王寺，其盛如彼，崇否顛倒，隆替易地，孔子

曰邦有道貧且賤焉恥也邦無道富且貴焉恥也蓋
小人之所榮乃君子之所恥古今同轍華夷共貫悲
矣哉攝人誇人必以天王寺壯麗雖京師諸刹無有
故聊書此以解其惑云

古學先生文集卷之一終

古學先生文集卷之二

子長胤 編輯

論類

太極論

太極者道之極也道者萬物之所由生也天地得之
以覆載四時得之以錯行日月得之以代明鬼神得
之以誦信常為陰陽之根而不物於陰陽能作萬物
之主而無形於萬物雖遠包六合之外而不遺一塵
之細能亙古今之久而不離一息之頃是故天地之

大萬物之品。太極無不在焉。而天地也。萬物也。亦皆莫不根於太極焉。吾觀夫芥子。其始以一粒芥子。下地。則生苗。成花。乃生數百粒芥子。再以數百粒芥子。下地。則數百粒芥子。亦各生數百粒芥子。其數百粒芥子。卽一粒芥子之所分。而亦無不各具生生之理。此謂天地萬物。太極無不在焉。其一粒芥子。卽數百粒芥子之所藏。而實生生之理所由出也。此謂天地萬物。莫不根於太極焉。於一而爲萬。萬而本一分。而愈多。藏而愈密。其理不亦精乎。而再求其所以爲一粒芥子者。本實無有。於是時。不可以形名焉。不可

以色言焉。謂之有。則無形。謂之無。則有理。既無有無之可辨。復無終始之可議。此所謂太極之真體也。謂之道。謂之性。謂之未發之中。謂之造化之樞紐。是故太極之妙也。無聲無臭。不可得而見也。其流行之端也。有動有靜。可得而見也。其動也。陽之生。以爲晝。爲暑。爲生。爲息。其靜也。陰之生。以爲夜。爲寒。爲死。爲消。蓋動靜者。自然之理勢也。太極者。所以然之妙也。是故動靜相乘。陰陽相生。不能獨勝。不能獨離。此爲天地之道。此爲萬物之本。予嘗一日坐齋中。觀檐雷。一滴一止。忽得太極動靜之妙。蓋天地之間。不能動而

不靜不能靜而不動無物不動靜無時不動靜大凡
至於死生之故盈虛之數及四體運用禽魚飛潛艸
木搖動磨礱旋轉皆無不得夫太極之妙而應於動
靜之機焉非引而喻之非借而明之嗚呼深矣哉
承應二年癸巳之歲

此論與下二篇俱系初年之作此篇最其體
驗之至者時年二十七壯歲志學鍛煉幾遭
而始會獨見非輒立說也此等篇可見矣

胤謹識

性善論

天地萬物莫貴於我往古來今莫尊於我以天性也
故能知其性者自以為堯舜不知其性者自以為桀
紂自以為堯舜者無所勸戒而日進于善自以為桀
紂者無所忌憚而日流于惡其可不畏也哉夫性也
者天之所命於我善而無惡者也蓋天地之際四旁
上下渾渾淪淪充塞通徹莫非是善也故人之性也
至明而不污至粹而不駁至貴而無上至大而無外
不為王者而加焉不為匹夫而損焉苟能順其性而
不害焉則全在我之天既全在我之天則與天地合
其德與日月合其明性豈不貴耶性豈不尊耶夫為

古學先師文集 卷之二 古義堂藏
飛魚躍各得其所。性也。乘馬服牛各就其用。性也。父慈子孝各盡其道。性也。夫倡婦和各得其分。性也。故聖人品其性以立教。順其性以施治。是故聖人在位則萬物遂其性。聖人不在位則萬物失其性。昔堯之治天下也。分命羲和以治四時。各授其政。舜之攝政也。乃命禹平水土。稷播百穀。契敷五教。皋陶明五刑。伯夷典禮。夔典樂。益爲虞。垂爲共。工是故天地以位。神人以和。鳥獸以蕃。艸木以蕃。豈出於性分之外。而所能爲乎哉。亦率其性而已耳。故性天下之所一。古今之所同。堯舜興則萬民悅焉。桀紂興則萬民怨焉。

天下之性一也。堯舜之德萬世仰焉。堯舜之道萬世由焉。古今之性同也。性之善可知矣。其謂惡者誣也。謂善惡混者迷也。謂無善無惡者昏也。性譬猶月也。善譬猶月之明也。夫謂善者能知月之明者也。謂惡者爲雲霧所遮。未見月者也。謂善惡混者見半陰半晴之月者也。謂無善無惡者瞽盲者也。自其謂惡者而下。皆所見之異。而非知性之真者也。而又以道性善者。或以爲非。或以爲未備。嗚呼。亦何異夫謂能知月之明者。或以爲未知。月或以爲論。月未備乎哉。蓋亦弗思焉耳。然有生而善者。有生而惡者。有教而能

善者有雖教而不善者何也。嗚呼。性之拘於氣習久矣。凡自堯舜以至途人。其間相去奚翅千萬。然所謂性者。未始有異也。是以君子自貴天性。不敢荒寧。知性也。小人每徇物欲。自昧天性。不知性也。可不懼也哉。而其知性與否。亦必係乎學與不學。是故古之聖人。獨憂天下後世。而不能自己。以其天性之可尚。而教之不可無也。

此論專究宋朝儒先之精奧。系二十八八九歲作壯年研覃如是。而後來發揮亦如是。

長胤謹識

心學原論

并序

可考

荀子曰。有學不至而言至者。循其言可以入道。門人曰。何謂也。曰。真積力久則入。斯言伊川程子深取之。予也嘗著心學原論一篇。苟學不至而言者。亦未循其言以入道者也。故自著此篇。以為楷程。君子勿議焉。然於精一之功。亦略有得焉。若得由此。益勵其功。上進執中之域。則荀子之言。亦可驗矣。論曰。聖人之學。心法也。不可以文字言說求焉。不可以意度臆想得焉。蓋具於心。而不假外求。出於天而不得他取。湛然一性。萬理自足。夫隆古之久。教法未立。典籍未作。民情一。而風俗自淳。道真全。而異說未起。上

不待教而導之。下不求學而至之。於是時雖六經未作。而六經之理具在。故求六經於六經未作之先。則六經之理得焉。求六經於六經既作之後。則六經之理失焉。何也。以六經之學本不過求於其具於心而出於天者也。其始見於經。蓋肇於堯之一言。開於舜之四句。而用功之密。具備於學庸語孟之書焉。堯之一言。允執其中。是也。舜之四句。人心惟危。道心惟微。惟精惟一。允執其中。是也。而學庸語孟所謂格致誠正。明善誠身。博約一貫。盡心知性等說。皆莫非祖述夫執中精一之旨也。蓋執中精一之訓。乃萬世道學

之根本準則。而學庸語孟之說。皆其羽翼權衡也。苟出於此。則非學也。夫中也者。性體之本然。而萬理之極則也。以心言之。而不外於天下之物。以理名之。而不遺於天下之事。存乎無方無體。而達乎至見至顯。該括周遍。一以貫之。無餘無歉。無增無減。無形象可覩。無方所可指。圓則爲規。方則爲矩。直則中繩。平則應準。天下之理。到乎此而盡矣。天下之事。到乎此而定矣。考諸三王而不謬。建諸天地而不悖。質諸鬼神而無疑。百世以俟。聖人而不惑。乃列聖相傳之符。而萬化之所由出也。嗚呼。中之爲義。至矣。盡矣。雖以天

下之物而不可喻焉。雖以天下之辨而不可盡焉。子思子始以喜怒哀樂之未發爲中。蓋喜怒哀樂之未發非中。而中體於是時自若也。世之求中者。徒知求之事爲應接之間。而不知其本於心體之本然也。故子思就喜怒哀樂之未發明之。深哉。深哉。設若不於是時認所謂中者。其孰從知而執之耶。然非嘿坐澄心之所能得也。亦非麤心浮氣之所能及也。蓋人之常情。不偏則必倚。不及則必過。一偏一倚。一過一不及。斯中體之所以難知而必易失也。嗚呼。非天下之至精。不足以知之。非天下之至一。亦不足以執之。若

大禹之聖。猶有假危微精一之訓而能焉。則其下者。其可不盡心乎。夫道心者。形而上者也。故謂之道。人心者。形而下者也。故謂之人。本不可分。而言之者。性情之謂。而非有兩心也。其形而上云者。各率其性。而不雜以人欲之謂也。形而下云者。各從其欲。而不根於天理之謂也。凡目之能視。耳之能聽。口之知味。鼻之聞臭。以至於孩提之愛其親。及其長而敬其兄。各率其性。而不雜以人欲者。皆謂之道心。不由形生者也。目之於色。耳之於聲。口之於味。鼻之於臭。以至於謀功求名。就利避害。各從其欲。而不根於天理者。

皆謂之人心。由形生者也。此人心道心之辨也。故盡其形而上者。而能節形而下者。則其至必見道心。而不見所謂人心矣。人心即道心也。從其形而下者。而不及形而上者。則其極必見人心。而不見所謂道心矣。道心役於人心也。故自道心而見之。則一自人心而見之。則二。其始也。無有間。而其卒也。至於天淵相懸。而不可反焉。可不畏乎。唯君子之心。能定於一。而亦無人心之雜焉。然而非謂廢情而用性也。蓋七情之所行。即一性之所用也。凡目之於色。耳之於聲。口之於味。鼻之於臭。自當天則。而人欲之污。無以混焉。

此之謂見道心。而不見人心。此之謂人心。即道心。所謂允執其中者是也。其曰人心惟危。道心惟微者。本就衆人之心而言之。非說君子之心也。蓋衆人之心。人心常行。而道心常隱。常行。故人心日危。常隱。故道心日微。此危則彼自微。此長則彼自消。兩者交雜於方寸間。而迭相為消長。從是而上。為君子矣。從是而下。為小人矣。所謂人鬼之關。王霸之界。君子小人之所分也。所以在上。聖猶必用精一之功。嗚呼。道心之體微而難見。人心之用危而易流。唯精可以識道心之真。唯一可以去人心之雜。夫精者。不粗之謂。一者。

不二之稱。省之察之。雖一毫人欲之萌。莫不之見焉。謂之精也。克之治之。雖一毫人欲之雜。莫不之去焉。謂之一也。精則明。一則定。精則通。一則確。精則易。一則簡。精則靈。一則神。知至至之。可與幾。謂之精。知終終之。可與存。義謂之一。有不善。未嘗不知。謂之精。知之未嘗復行。謂之一。立則見其參於前。在輿則見其倚於衡。謂之精。從心所欲。不踰矩。謂之一。思之思之。又重思之。思而不得。鬼神將通。謂之精。用志不分。乃凝於神。謂之一。至精之極。見微如顯。至一之極。持危如安。可以見道心之體矣。可以御人心之用矣。在昔

紀昌學射。三年。觀虱如車輪。大至精之謂也。王良御馬。涉嶮如平地。至一之謂也。學者苟非有紀昌之功。與王良之材。則不能識其妙。而造其域也。夫聖人之學。天下之至難也。苟欲任天下之至難者。不可以不用天下之至功。欲用天下之至功者。則非自盡其心不可也。自盡其心焉。則學者之事畢矣。精一之學。盡矣。然盡心有道。必也持其志。勿暴其氣。則可也。蓋其志高者。其氣必暴。其氣暴者。忿厲激怒。必無從容涵蓄之態。於進道必有害。觀古之妙。曉方技曲藝者。必專心致志於此一事。不知外好。不恤外議。優游自得。

樂之終身故得能成其業而有其名也。蓋自得盡心之道也。嗚呼。非造方圓於未有規矩之先。作平直於未有準繩之先者。則不可以當堯之一言也。非不待規矩而知方圓。不待準繩而知平直者。則不可以當舜之四句也。而非知規矩準繩。而不為規矩準繩所使者。亦不能以知學庸語孟之說。而上會堯舜二聖之言也。非自盡其心。何以能之。昔者子思問於孔子曰。物有形類。事有真偽。必審之。奚由子曰。由乎心。心之精神是謂聖。推數究理。不以物疑。周其所答。聖人病諸。蓋心之精神。不疾而速。不行而至。以言乎遠。則

不禦以言乎邇。則靜而正。其可不謂之聖乎。故自盡其心。則無深不入。無遠不到。無幽不照。無微不通。至矣。夫復何言。

此論之作。亦與上篇同時。而稍後。

長胤謹識

漢文帝除肉刑論

凡物之得失。必可徵之久遠。而不可以一時究也。可驗之四方。而不可以一處限也。其經久遠而不可改。通四方而不可易者。乃善之善者也。故事定于久而道伸于遠。一人之從違。不若天下之公議。一時之是非。不若萬世之定論焉。昔在漢文帝。感淳于公少女

緹縈之言。終廢肉刑。易以笞刑。其事固淺。其慮固近。非有夜以繼日。坐以待旦之思。然而自漢迄今。殆二千載。因循承襲。若出一轍。無少變焉。則豈非向所謂經久遠而不可改。通四方而不可易者邪。若夫田賦封建。官制服章。降自魏晉。以迄唐宋。一代自有一代之制。未有若用笞刑之經久遠不改者也。然議者或以輕改先王之典。罪文帝。愚竊以爲不然。夫天下者。勢也。勢之所在。猶水之就下。船之從風。往其所嚮。止其所至。雖聖人不能挽而回之。先王用肉刑。勢也。文帝除之。亦勢也。設使肉刑猶在。雖無文帝。人必除之。

奚獨罪之。蓋世淳則事簡。事簡則刑寡。刑寡則民懼。世澆則事多。事多則刑繁。刑繁則民侮。民侮則法不勝其繁。吏不勝其煩。而天下將無完膚之民。雖欲不除。豈可得乎。昔者聖王之治天下也。必有本有末。本者謂道也。末者謂法也。道者體也。法者用也。道以仁行。法以義立。法或可改。而道終不可變焉。故善觀聖人者。以道而不以法。班志載其詔曰。或欲改行爲善。而道亾。繇至斷支體。刻肌膚。終身不息。何其刑之痛而不德也。豈稱爲民父母之意哉。可謂不樂入之有過。而開其自新之塗矣。是故以法言之。則固不能無

蓋於聖人而以道論之。則實有合於惟刑之恤之意矣。若其凡事必以出於古爲是。而以出於今爲非。則假使聖人生於今世。用於今世。亦且莫奈之何。請數而言之。古者封建。後世則郡縣。古者井田。後世則租調。古者車戰。後世則騎兵。古者地坐。後世則椅子。古者篆籀。後世則隸楷。若欲使此等類。一一復古。則天下騷然。雖民力竭而骨朽。亦不可成矣。譬則療病。古者專用鍼灸。少用藥餌。若爲醫者。曰是古之法。而盡廢藥餌。獨任鍼灸。則其不誤人者。未之有也。大抵諸儒之論。得其末。而遺其本。泥其跡。而失其理。作刑之

意未明。而聖人之旨已荒矣。夫刑之於天下。雖不可一日無。然非恃以爲治者也。苟德足以治天下。則雖不刑一人可也。奚問其法之疎密。昔周成康之間。刑措不用。殆四十年。漢文景之際。又斷獄數百。幾致刑措。設若以漢之薄俗。移周之淳風。使成康之君。在文景之地。則其治亦不止於此。故兩言決之。用肉刑亦治。不用肉刑亦治。不若不斷支體。不刻肌膚。而致太平之爲愈也。按五刑之名。肇見於虞書。而未聞其法如何也。至於周禮司刑。始有墨劓剕宮大辟之目。然而虞夏之間。未或之聞焉。則不當以舜之五刑。其名

適同。槃而一之也。盤庚呂刑皆伏孔所傳。而其詞語實為商周真書記其事。必當得其實。而盤庚謂我乃剿殘滅之。無遺育。今觀其大辟下。即施以劓刑。未有劓宮之刑。則知其時五刑之法。猶未備也。況於舜之時乎。呂刑謂苗民作五虐之刑。曰法。殺戮無辜。爰始淫為劓刑。桮黥。今詳其言。肉刑蓋頑苗之所為。而為舜之所除也。彰彰然明矣。曾謂舜而用之。此亦苗焉耳。奚足以為舜也。二書所書。既已若此。則舜典所謂五刑。非後世肉刑也。必矣。其以舜之五刑。乃當肉刑。是鄭氏之妄。而後儒過而信之耳。不足為據也。而周

禮大司寇以五刑糾萬民。一曰野刑。上功糾力。二曰軍刑。上命糾守。三曰鄉刑。上德糾孝。四曰宮刑。上能糾職。五曰國刑。上愿糾暴。舜之五刑。或是此之類也。雖則非是。亦未可斥為苗民虐刑之類也。且大司寇刑官之長。而司刑其屬官也。而大司寇直言五刑。而司刑曰五刑之法。則是大司寇所說。蓋其正名。而司刑說其用刑之法耳。而不容一官而有二名焉。則周所謂五刑。亦非指肉刑而言之也。大抵秦火之餘。漢儒之說。皆不足考信。意者肉刑之制。或起於商之叔世。但周公循而用之也耳。嘗觀聖人之制禮。因古而

存者有矣。就舊而改者有矣。以義而作者有矣。隨俗而行者有矣。要之皆非以意穿鑿。一時撰出者。吾疑肉刑亦必是聖人依俗而用之者也。不然聖人亦何心哉。豈自作意作若刑為若法耶。今人不察。皆以為盡自聖人意中出。豈其然乎。豈其然乎。周官曰。刑新國用輕典。刑平國用中典。刑亂國用重典。呂刑又曰。刑罰世輕世重。若以古今通而論之。則三代已前當在平國例而從重。三代已後當在新國例而從輕。其欲出於三代之後。復用肉刑者。是欲刑新國從其重也。於乎亦不仁矣哉。而後之論文帝者。多曰。帝之去

肉刑其意美矣。然改先王之典非也。斯言亦非也。何則。文帝之去肉刑其意已美也。則改先王之典亦可也。改先王之典已非也。則去肉刑之心亦非也。此是則彼亦是。彼非則此亦非。安有一事或是或非者耶。嗚呼。儒者之論道含糊不通。多至於此。可笑之尤也。

論春秋鄭伯克段

春秋王法之權衡也。劑量的確。尺度明審。不爽錙銖。不失抄忽。詞至簡嚴。理極明白。蓋其操之也公。故其處之也平。其居之也寬。故其應之也當。仁義以為本。忠厚以出之。禮義以行之。謹嚴以成之。重者不為之。

過重輕者不爲之過。輕其意蓋欲洗濯夫亂世之濁而輒回乎治古之盛。書曰：刑期無刑，民協于中。此夫子之意也。而後之說春秋者，以爲隻字單語，寓之褒貶，日月名爵爲之予奪，殆以聖人忠厚經世之典，還爲法吏刻深苛密之風，不亦謬乎？夫聖人之經，周遍詳密，雖褒貶予奪，自存於屬辭比事之間，而其意全在反三代之德，而初非有意於褒貶予奪之也。猶易之排布奇耦，發揮剛柔，而吉凶悔吝，自具於卦爻之間也。故以吉凶悔吝求易者，易之末也；以褒貶予奪求春秋者，春秋之末也。苟不知此義者，不可以讀春

秋焉。春秋之爲經，有正意，有餘意，而兩者之中，又有四義：曰賓主，曰輕重，曰必誅，曰垂戒。其正意者，夫子之意，而餘意則自存於經者也。若鄭伯之失教，與段之亂倫，在叔段則爲正意，在鄭伯則爲餘意。若以賓主論之，則鄭伯爲主，叔段爲賓，以輕重論之，則叔段爲重，鄭伯爲輕，而叔段之罪，則春秋之必誅，而鄭伯之過，則春秋之垂戒也。經之爲義，若是也已。其稱鄭伯者，何？殺國君之介弟，不可以稱大夫，不可以稱國人。穀梁子曰：殺世子母弟目君是也。其曰克者，見段之強，驚雋傑於鄭若一君也。稱段則見著不弟之罪。

不與齒列也。皆罪段之辭。而於鄭伯自存垂戒之意。且無兄之弟。與失教之兄。其罪孰重孰輕。若不致誅於無兄之弟。而特加罪於失教之兄。則吾知非惟舉法失輕重。實啟後世濫刑之途。此豈聖人之書乎哉。克段之事。左氏謂之鄭志。恐非也。吾意莊公昏弱無斷之人耳。未必殘忍果殺之人。觀其不勝其母。使段放恣。則足以見莊公之爲人也。而以穎封人之言。母子若故。又辱段之餬口於四方焉。則可見後猶不忘段也。左氏之論亦刻矣哉。而治左氏者皆以謂春秋之義微顯闡幽。何哉。蓋春秋據事直書。其義自見。若

所謂微顯闡幽者。自後人目之。非聖人之意也。自世衰道微。實是實非。無所折衷。凡世俗所謂是者。未必皆是。而所謂非者。亦未必皆非。故聖人揚之抑之。予之奪之。歸之至當。而後止。若所謂微顯闡幽者。非聖人之意也。而若趙盾之事。歐陽子全信經而廢傳。然三傳皆有明據。則不可必非之。且聖人之聽獄也。先情而後法。而其最所深惡者。隱隱之惡。與今將之心而已。此兩者。盾皆有之。則辭亦不可以常斷之也。惟後之學者。準盾之事。盡解春秋者。誤矣。

論齊侯使弟年來聘

昔者孔子之作春秋也。於災異不言事應。而事應具存。後世史臣之著五行志也。遇一災異必載事應。吾以此知春秋之所以爲春秋。而亦覺諸儒之傳春秋者。則似史臣之著五行志也。而春秋所書非惟災異爲然。至於凡列國之會盟戰伐。諸侯之卽位薨卒。內外之送女逆女。卿大夫之交聘使節。一經之體莫不皆然。至於後之說春秋者。則字字穿鑿。事事牽合。殆如解隱語。何其謬也。嗚呼。聖筆之妙。猶化工之肖物。化工無心造物。而物莫不具。聖筆無意載理。而理莫不備焉。無心造物者。不可以詞述。無意載理者。不可

以言傳。夫不可以詞述者。非不可見之顯然焉爾。察然焉爾。不可以言傳者。非不可知之昭然焉爾。晰然焉爾。故明者非見其難見之謂。而能見其易見之謂也。知者非知其難知之謂。而能知其易知之謂也。易見易知者。至理之所存也。隱七年齊侯使弟年來聘。齊侯者。齊僖公也。弟年者。齊侯母弟也。來聘。列國之常事也。本非有隱義。亦非有典故。然而自千載之下。而觀之。齊侯之寵遇母弟。陷于偏愛。弟年之恃恩狎愛。不知自節。及當時諸侯不用王命。肆相聘問。旣自隱然于言詞之表。故曰。聖筆無意載理。而理莫不備。

焉。豈亦非昭然晰然易知者耶。夫兄弟之愛。天性也。誰謂寵遇之過。昔象日以殺舜為事。及立為天子。封之有庠。猶欲其常常而來也。況於弟。未為象而不欲殺已者乎。齊侯之愛年也。其所宜矣。吾故不謂其愛之過。而必謂其愛之偏也。家有二子。一愛一憎。愛者必驕。而憎者必怨。其怨者未必敗家。而驕者必亂其家。故君子公而不私。謂其不可有偏愛也。詩曰。兄弟既翕。和樂且耽。齊家之難也。夫花萼之樓。大衾之御。古以為美談。何齊侯之不思也。傳曰。人之其所親愛而辟焉。齊侯之謂也。

論堯舜既沒邪說暴行又作

予頃私策問諸友曰。世所傳諸子百家。異端邪說。皆聖遠經殘之所致。實戰國以來有之。上世無有。然孟子嘗曰。堯舜既沒。聖人之道衰。邪說暴行又作。而於文武周公之後。又曰。世衰道微。邪說暴行有作。臣弑其君者有之。子弑其父者有之。孔子懼作春秋。竊思孟子所謂邪說者。必有所指。若楊墨之徒是也。而以又作二字觀之。則邪說之害。非啻戰國以來有之。實孔子以前既有之。非啻孔子以前既有之。亦似乎堯舜以前實有之。吾不知其如何說。豈許行所為神農

之言。漢世所尚黃老之術者。本非戰國之間所爲撰
焉。而上世實有之歟。抑上世所謂邪說者。非後世諸
子百家之類。而別有所可擬議之者歟。云云。而及閱
諸友所對。多揣摩模寫。依傍名理。而未有明據事實。
足以取信於後世者焉。故又自代諸友爲之擬對。究
論堯舜以前。實有邪說暴行。且併及于孔子之聖。於
是爲最大。而生民以來。未嘗有之實。曰。按周禮外史
掌三皇五帝之書。春秋左氏傳。楚左史倚相能讀三
墳五典八索九丘。說者謂卽上世帝王遺書也。而漢
孔安國曰。伏犧神農黃帝之書。謂之三墳。言大道也。

少昊顓頊高辛唐虞之書。謂之五典。言常道也。可見
孔子時。三皇五帝之書猶在。而三墳言大道。五典言
常道焉。則夫子皆當祖述之。而特斷自唐虞以下。三
皇三帝之書。皆在所黜焉者。何哉。夫聖人之道。萬世
通行之典也。故其道謂之常道。其書謂之經典。言其
當萬世通行也。豈常道之外。別有所謂大道者乎哉。
外常道。而別有大道焉。則可知大道云者。僂非萬世
通行之典矣。竊以謂彼所謂大道者。則必是虛無恬
澹。無爲自化之說。而非堯舜孔子之所取焉。想虛無
恬澹。無爲自化之說。匪柱下漆園。舛倡其說。蓋自上

世已有之。世所傳黃帝內經者。恐非悉七國時書。又
屈子所述周靈王太子晉之語。追周廟金人銘。孔父
鼎銘。亦往往與其意相符焉。則虛無恬澹。無爲自化
之說。自上世已有之。彰彰然明矣。而漆園鄭圃之書。
屢屢稱黃帝之名。孟子時。楚許行者爲神農之言。有
與民並耕之說矣。則知自上世。別有非堯舜之道。而
號神農黃帝之道。相稱述於世者焉。其爲孔子之所
黜矣。由是推之。則知雖宓犧之學。亦不得爲全與
堯舜之道相同。太史公曰。余登箕山。其上蓋有許由
冢云。乃實其有是人也。凡廣成子下。隨務光之流。蓋

皆古隱君子。有奇行者。曠代相傳稱焉。則未必無其
人也。孟子所謂堯舜孔子以前。邪說暴行者是已。蓋
邪說者。暴行之本。暴行者。邪說之發。有則俱有。非有
二也。大凡離於人倫。遠於日用。無益乎天下國家之
治焉者。皆謂之邪說。皆謂之暴行。惟堯舜之君在位
焉。則天下一家。道德一。而風俗同。君君臣臣。父父子
子。夫夫婦婦。兄兄弟弟。忠信和睦之風隆。詭行異論
之徒熄。蕩蕩平平。無偏無黨。家自齊國自治。而天下
自平矣。虛無恬澹之說。自無所興。無爲自化之教。自
無所倡。是爲中庸之至。是爲王道之極。聖人旣沒。世

古學先生文集 卷之二
衰道微異端蠡起。邪說並興。敢肆私說。無所顧諱。以常道爲卑。而不足爲。以綱常爲近。而不加勤。家家異道。人人殊說。先王之道術。於是瓦解。裂不復統。一矣。不識道者。爲其所眩。瞽蔽錮驚。以爲至言。爲妙道。匍匐而從之。以爲遠勝於堯舜之道。而非周孔之所及。悲哉。道二邪與正而已矣。天下豈有大於常道者乎哉。若謂外常道而別有大道焉。則其所謂大道者。必是邪說也。故人倫之外無道。仁義之外無教。人之所當務力者。人倫而已矣。人之所當竭力者。仁義而已矣。夫天運於上。地載於下。日月代明。四時錯行。人

不能爲力於其間。在君惟當盡君之道。在臣惟當盡臣之道。在父惟當盡父之道。在子惟當盡子之道。人人盡己之道。而天下平矣。學雖闡天人之祕。智雖洞象數之原。然無益於人倫。無裨於世道者。聖人不取焉。故孟子曰。堯舜之道。孝悌而已矣。又曰。堯舜之知而不徧物。急先務也。堯舜之仁。不徧愛人。急親賢也。向所謂離於人倫。遠於日用。無益乎天下國家之治焉者。皆謂之邪說。皆謂之暴行者。以其不可與入于堯舜之道也。譬諸珍羞異味。人多貪饒。至於五穀常膳。則不知嗜焉。然而舍五穀常膳。則無可以食也。大

凡世之所崇信奉承致恭盡敬而藉藉乎時焉者皆
珍羞異味之類而堯舜孔子之道則五穀常膳也人
雖固不知尊之然亦不能一日舍此而不由焉大矣
哉赫赫皇天篤生孔子旁觀古今歷選羣聖祖述其
當祖述憲章其當憲章雖三皇三帝之書猶在所黜
焉而獨斷自唐虞以下祖述憲章之而後天下萬世
君臣父子夫婦兄弟朋友之倫明而無所迷惑邪說
暴行猶烏葛之於嘉穀自不得與正道相混焉則孔
子之德之學之大其爲如何哉非有若身坐堂上能
辨堂下人之曲直之智則不能也故孟子曰賢於堯

舜遠矣又曰聖人之於民亦類也出於其類拔於其
萃自生民以來未有盛於孔子也嗚呼與天地同其
大與日月同其照超於三皇跨於五帝獨爲天下萬
世帝王臣民之師表者其惟孔子一人爲然非知道
者孰能識之猗與盛哉人以爲邪說暴行皆戰國以
來有之上世無有不然唐虞以前邪說暴行者方堯
舜氏起而退聽喪縮不復出頭孔子以前邪說暴行
者又及于孔子出煙飛霧散不復存跡猶大陽中天
鬼魅狐惑自伏匿而屏息故後世所以不復知上世
自有邪說暴行者蓋爲此故也唯黃老之說遺孽猶

古學先生文集 卷之二 廿二 古義堂藏
在。至漢再熾。瞿曇之學自外入。寇。浸爾。跳梁。至隋唐始盛。迨宋大躁。鉅儒輩出。雖爲之痛排。浚辨。不遺餘力。然愈撲愈熾。愈廢愈興。其所以卒不息者。爲徒託之空言。而無堯舜孔子之德也。夫道德盛則議論卑。道德衰則議論高。議論愈高則離乎道德。愈益遠矣。故議論之高。衰世之極也。而其最高者。至禪而極。故離於人倫。遠於日用。無益乎天下國家之治焉者。亦莫禪爲甚。儒者以爲當以議論勝之。誤矣。苟使吾道德盛焉。則彼自退聽。將服從之不暇。若不是之務焉。而徒欲以口舌與彼角衡。猶赤手與人鬪。相傷俱止。

可謂陋矣。故孟子曰。君子反經而已矣。經正則庶民興。庶民興。斯無邪慝矣。昔者孔子成春秋。而亂臣賊子懼。蓋謂春秋成。而後君臣父子夫婦昆弟朋友之倫明。故亂臣賊子自知其無所逃罪。故懼焉。非謂讀春秋書。而亂臣賊子乃懼。是亦學春秋者所當識也。故遏邪說之術。修吾道德爲上策。以倫理攻之爲中策。辨理之有無。寂感爲下策。韓歐出中策。程朱出下策。其得上策者。孔孟以後未之或聞也。惜哉。元祿

元年戊辰仲秋日

學者不可不深知堯舜之道。實爲萬世極至之理。

而不可易焉。又不可不實。知孔子之聖。生民以來。所未嘗有。而賢於堯舜遠矣。乃斯道之蘊奧。學問之至要。雖若一事。實一理也。學者於此。未之或得焉。則造理雖深。講學雖明。然不免東西瞶迷。認賊為子。其不能於道無差也。必矣。若後世儒者。流為禪莊者是已。可不慎乎哉。孟子以來。無人能道到者。惜哉。予去歲秋間。嘗為諸生著此論。自以謂詞雖凡近。理實根極。實有用之文章也。雖董之三策。韓之原道。亦不多讓焉。然人無識之者。視以為經生之常談。而不復留意於此。予深以為遺憾焉。不

敢為誇言。而欺世之無識者也。其識道者。必能諒諸已已。閏正月驚蟄前一日。仁齋跋。

荀子性惡論

荀子以性為惡。其言固偏矣。而宋儒深非之。然荀子亦戰國間一賢儒。宗堯舜。尊孔子。以衛斯道為己任。未必在揚韓下矣。若使荀子之旨。如宋儒之所譏焉。則荀子乃喪心悖亂癡狂之人焉耳。安在其為賢儒也。其言雖固不免為太偏。然亦不為無一般之見焉。中庸曰。自誠明謂之性。自明誠謂之教。誠則明矣。明則誠矣。言性教兩者。其功相埒。而其致無二也。性者

孟子所謂性善是也。知擴而充之可矣。教者孔門所謂學問是也。知有所本可矣。性緣教以成其大。教因性以爲其地。兩者相須而不可偏廢。故論語專以教爲主。而孟子亦以性爲本。其言若異。而其理則同也。若夫知有性而不知有教。則專尚乎一心而不足以治天下。若佛氏之流是也。知有教而不知有性。則無有所本。而道德不過爲後來之漸。有若荀子之說是也。其意以爲人之爲聖賢。爲君子。皆教之功也。若悉廢學問。獨任其性。而不用脩爲之功焉。則情縱欲熾。其卒必陷乎惡。桀紂是也。故專知貴教。而以性爲惡。

其所著勸學一篇。滋味溢口。句句可取。是其所以雖不免爲太偏。然亦有一般之見也。彼蓋觀論語專主教。而不言性。而遂爲此一偏之說。殊不知孔子雖不明言性之善。然性善自在其中矣。嘗曰。仁遠乎哉。我欲仁。斯仁至矣。又曰。道不遠人。人之爲道。而遠人。不可以爲道。其以聖人君子望人。皆由夫性之善也。若使人之性。頑冥不靈。如犬牛然。則雖告之以仁義之美。而且無聞知焉。藉令百荀子曰。咻于其側。而不能使其入于善。惟其善。故雖盜賊之至不仁。猶且善善惡惡。毀之則怒。譽之則喜。其情之可與爲善也如此。

況乎君子之於仁義。不啻芻豢之悅我口。非性之善。豈能然乎。此孟子所以發性善之論。而孔子雖不明言性之善。然性善自在其中也。然而徒知性之爲善。而不知學以充之。則性之善無有於已。而不足以盡夫道。故曰。苟不充之。不足以事父母。又曰。苟失其養。無物不消。苟充而又充。進而不已。則其德之充。大不可得。而限量焉。可以盡人之性。可以盡物之性。可以贊天地之化育。豈翅盡已之性之謂而已乎哉。此學問之功之所致。而非性分之所能及。故曰。以直養而無害。則塞于天地之間。性之善不可恃焉。而學問之

功不可不尚也如此。此孟子之學所以性教兼備。而荀子之論不免爲偏見也。或問歐陽子之言曰。聖人之教入性。非所先。龜山楊子非之曰。人性上不可添一物。堯舜所以爲萬世法。亦是率性而已。如何。予應之曰。歐陽子之言。卽荀子之識見。而龜山之論亦佛氏之緒餘也。若堯之至聖。生知安行。誠明全盡。固匪區區議論之所能盡也。然欽明文思。卽盡其性焉者。而光被四表格于上下。乃德之推也。在學者則謂之擴充之功。非性分之量能然。蓋已之性有限。而天下之善無窮。欲以有限之性。而盡無窮之善。非學問則

不能也。凡物必有所至也。有所不至也。至於其所至者。性也。能致於其所不至者。非性之力也。學問之功亦大矣哉。夫孔子之性。與堯舜之性。固當相近。然至於孔子之聖。則賢於堯舜遠矣。而自生民以來。未有盛於孔子也。則學問之功之大。其爲如何哉。孔子曰。有教無類。又曰。性相近也。習相遠也。皆言學問教習之可尊可重。而性之美惡。不暇乎論也。若龜山專知有性。而不知有教者。亦可謂誤矣。元祿四年秋七月星夕。伊藤維楨撰。

孟子勸諸侯行王道論

或曰。孔子之時。周室雖微。遺澤尚存。故春秋以尊周爲義。至孟子時。王靈掃地。誰復知有周。當是時。諸侯能行王道。則可以王矣。此孟子所以勸齊梁之君也。孔孟惟視天命之改與未改耳。其心未初異也。予曰。子論甚正矣。然於孟子之本旨。則未之盡也。夫王者本以德而言。未必斥位言之。吾子之意。亦將以廢周天王。自踐天子位。號令諸侯。而後方可。此當時辨士猶欲蹈東海而死者。豈孟子而爲此邪。昔成湯放桀于南巢。諸侯大會。湯退而就諸侯之位。曰。天子惟有德者可以處之。三讓。諸侯皆推讓湯。於是卽天子之

古學先生文集 卷之二 十一 古義堂藏
位。孔子曰：三分天下有其二，以服事殷。周之德，其可謂至德也已矣。周之德，蓋通文王之末，武王之初，未伐紂之前而言。故不曰文王之德，而曰周之德也。若使紂惡不至如後來之貫盈焉，則武王猶守臣節，如故而盟津之兵，未必觀焉。在成湯亦然。此王者之心也。其有南巢牧野之事，蓋聖人之不幸不得已而行之者也。故孟子每論道德，則必稱堯舜。論征伐，則必稱湯武。蓋為是也。齊梁之君，若能聽孟子得行王道而王焉，則當尊周之天王，已自修方伯職，號令諸侯，聘享以時，始終無渝，臣節矣。若天下朝覲者不之周

之天王，而之齊梁之君，訟獄者不之周之天王，而之齊梁之君，謳歌者不謳歌周之天王，而謳歌齊梁之君，天子亦不自安其位，使其卿士持節奉冊，禪以天子位，然後不得已而受王命，奉周之天王，以一侯國如山陽公，鄴國公例，永使周祀不絕，而後之中國踐天子位焉。是王者之心，而孟子所謂王道者如此。若不然，而曰天命已改，遽廢天子，以為庶人已自抗然，敢居天子位，是篡也。王者不為，何以言之？孟子嘗遇宋牼於石丘，牼曰：吾聞秦楚構兵，我將見楚王，說而罷之。楚王不悅，我將見秦王，說而罷之。二王我將有

古學先生文集 卷之二 十八 義堂藏
所遇焉。孟子曰：先生以仁義說秦楚之王，秦楚之王悅於仁義而罷三軍之師，是三軍之士樂罷而悅於仁義也。爲人臣者懷仁義以事其君，爲人子者懷仁義以事其父，爲人弟者懷仁義以事其兄，是君臣父子兄弟去利懷仁義以相接也。然而不王者，未之有也。夫天無二日，人無二王，孟子固嘗誦之。今若秦楚之王同悅於仁義，則皆俱得王焉。然則是人有二王也。孟子之言必不爲若此之前後顛倒，理不相入也。竊謂秦楚之王其不相下，各持已逼人以正位號爲先，則是非去利懷仁義者，乃人有二王也。苟秦楚之

王信能去利懷仁義以相接也，則互相推讓，年鈞擇賢德鈞以下而立其可立者，已自退然歸其封疆，謹修首職，不敢生一毫希覬之心，又不敢生一毫忿爭之心，終身訢然以自樂，不亦可乎？非特秦楚之君爲能然，舉天下諸侯亦然，非必視天命之改否以爲去就之謂也。王道之效不其大乎？昔者堯薦舜於天，二十有八載，堯崩，三年之喪畢，舜避堯之子於南河之南，舜薦禹於天，十有七年，舜崩，三年之喪畢，禹避舜之子於陽城，天下之民不從堯舜之子而從舜與禹，然後之中國踐天子位焉。斯之謂三有禮，寧我棄天

下而天下不我棄焉。而後敢從天下之心。此王者之心也。若謂天命在我。遽登天子之位。行天子之事。豈其本心乎哉。嗚呼。王道之義。隱于天下久矣。雖被服儒者。徂世俗之恆見。而不識王道之正大。故於孟子之言。或詆或刺。或非或疑之。又或得其皮膚。而遺其真髓。孟子之旨。鬱乎不著於後世也。宜矣。元祿四

年辛未秋八月初五日

論諸葛孔明非王佐之才

先儒許孔明以王佐之才。吾未知其當與否。孔明雖專仗信義。取強於一時。然其所自恃者。在力不在德。

不知反本。唯末之視。夫王者以德。不以力。霸者以力。不以德。以力不以德。故天下皆敵。以德不以力。故天下無敵。孔明廁乎三國鼎立之間。專急復漢業。而無有意安天下之民。夫天下者。天下之天下也。非長爲漢氏之物。苟可興焉。則興之可矣。否則唯當安吾民焉耳。是王者之心也。孔明以罷弊益州之地。欲以魏吞吳。削平天下。此所謂鄰人與楚人戰者。而不明之甚也。湯事葛。文王事昆夷。古有成法。誠敬以事之。忠信以待之。久而不怠焉。則彼二國者。亦將得懼心。不可不我聽也。而後鑿斯池。築斯城。與民休息。躬雖已

斃陰平之兵不來。漢祚亦以永存。於是創業垂統。為可繼也。則後世子孫必有王者矣。予觀孔明在隆中。自比管仲樂毅。則知王道非其好也。故出師表曰。動引聖人羣疑滿腹。由是觀之。其所志所期。自可知也。不能為伊尹周公之業也。必矣。

此段文字在右頁，內容與左頁相呼應，但文字較為模糊，難以逐字辨認。其大意應與左頁所論之志、觀、養、祭等義相貫通。

解類

父在觀其志章解

與山形宗房

觀者。觀其有實於內也。志者。謂志于善也。行者。謂循于禮也。蓋人子之孝。雖難以一盡。然必以立身行道。不失令名為本。故父在。必志于善。而無放逸之思。父沒。一循于禮。而無淫瀆之行。然後為能全事親之道。若不然。則雖日用三牲之養。不得為孝也。此二句。即與祭統所謂生則養。沒則喪。喪畢則祭。養則觀其順也。喪則觀其哀也。祭則觀其敬而時也。盡此三道者。孝子之行也。同其語意。而三年無改於父之道者。又

此段文字在左頁，內容與右頁相呼應，但文字較為模糊，難以逐字辨認。其大意應與右頁所論之志、觀、養、祭等義相貫通。

夫子所謂孟莊子之孝也。其他可能也。其不改父之臣與父之政。是難能也。之意。蓋道者通行之謂。而非可遽改者。然人有小才。則生有不然其父之意。死必改其道。天下之通患也。況乎父有積累之功。而子壞墮之者。世每有之矣。故能奉行父之道。不少變改焉。可稱孝矣。以三年言者。蓋過三年以往。難言父之道也。若其道固終身守之可也。中庸又以武王周公為達孝。即與此章意同。

智仁勇解

人有大患三。曰惑。曰憂。曰懼。斯三者。人之大患也。惑

則以惡為善。以善為惡。以危為安。以安為危。東西易位。冠履倒置。憂則居安而不知安。處常而不知樂。天地為之隘。日月為之短。鬱鬱度日。戚戚終身。懼則知退而不知進。知縮而不知伸。懦而不立。脆而易折。與妾婦同趣。奴僕同伍。民斯為下矣。將何以免之乎。孔子曰。知者不惑。仁者不憂。勇者不懼。智者猶日月之明。纖悉畢照。是非非無所不當。仁者猶天地之大。蕩蕩乎包容弘。物無能礙。勇者猶剛風之動。颺颺乎拔樹掀屋。無遠不屆。故能斯三者。則可以為君子。可以為聖人。可以獨立乎天下。而表表乎萬世之遠。

矣。故謂之天下之達德。蓋智以明之。仁以行之。勇以斷之。非智則莫能進。仁勇之德。非勇則亦莫能成。智仁之德。然智而無仁。則必鑿焉。勇而無仁。則必亂焉。故仁在於兩者之間。而能統兩者之德。是其所以次第論之也。愚以謂智仁勇之德。固大矣。然不學以照之。則智不智。仁不仁。勇不勇。故曰好仁不好學。其蔽也愚。好智不好學。其蔽也蕩。好勇不好學。其蔽也亂。唯學問之功能。輔智仁勇之所不及。而救偏補弊。黜浮剷邪。使其自歸于大中至正之域矣。大哉君子。不可不務學如此。然學者好高譚理性。而不知學問之

功。蓋天蓋地。如其大也。是近世講學之陋習也。蓋性學盛。則教法衰。教法衰。則三綱以淪。九法以斁。至於操心繕性。日用常行之間。皆不得其所。學問之不可不講。亦如此。或曰。經傳每以仁義並稱。或以仁義禮智列敘。而又有智仁勇之目者。何哉。曰。仁義禮智之稱。經也。智仁勇之目。緯也。仁義之稱。以配陰陽。禮以節文之。智以知而不去。此天地之大經。學問之定目。故曰經也。智仁勇三者。君子之所以成其德也。故中庸曰。天下之達道五。所以行之者三。論語曰。君子之道者三。仁者不憂。智者不惑。勇者不懼。其曰君子

Handwritten text in Chinese characters, likely bleed-through from the reverse side of the page. The text is partially obscured by a blue border and some staining.

古學先生文集
卷之二
六
Handwritten text in Chinese characters, including a signature and a date. The text is written in a cursive style and includes a red seal.

Handwritten text in Chinese characters, including a signature and a date. The text is written in a cursive style and includes a red seal.

